

**MESYUARAT PERTAMA, PENGGAL KELIMA
PARLIMEN KEEMPAT BELAS
2022**

HARI SELASA : 8 MAC 2022

JAWAPAN-JAWAPAN BAGI PERTANYAAN-PERTANYAAN JAWAB

LISAN YANG TIDAK DIJAWAB DI DALAM DEWAN

(SOALAN NO. 14 HINGGA NO. 82)

NOTA: [RUJUK PENYATA RASMI HARIAN (HANSARD)]

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : YB TUAN KESAVAN A/L SUBRAMANIAM
[SUNGAI SIPUT]**

TARIKH : 08 MAC 2022 (SELASA)

SOALAN

TUAN KESAVAN A/L SUBRAMANIAM [SUNGAI SIPUT] minta **MENTERI SUMBER MANUSIA** menyatakan status terkini Skim Khas Pembiayaan Rumah Pekerja Estet (SKRE) Sime Darby yang telah menyerahkan tanah seluas 4 hektar Ladang Elphil untuk membina 100 unit rumah teres dua tingkat berharga kurang RM150,000 untuk pekerja – pekerja di ladang tersebut.

JAWAPAN

Tuan Yang di-Pertua,

Pelaksanaan Skim Khas Pembiayaan Rumah Estet telah tamat pada 31 Disember 2020 apabila berakhirnya Rancangan Malaysia Ke-11. Walau bagaimanapun, Kementerian Sumber Manusia telah memohon kepada Unit Perancang Ekonomi supaya program ini dapat diteruskan melalui Rancangan Malaysia Ke -12 (RMKe-12).

Pihak Kementerian Sumber Manusia melalui Jabatan Tenaga Kerja Semenanjung Malaysia telah menjalankan perbincangan bersama pihak Lembaga Perumahan Hartanah Perak untuk membina perumahan bagi pembelian oleh pekerja - pekerja Ladang Elphil di Sungai Siput, Perak. Pihak Lembaga Perumahan Hartanah Perak telah bersetuju untuk membuat kajian berkaitan perkara ini dan Kementerian Sumber Manusia akan melaksanakan program Skim Khas Pembiayaan Rumah Estet setelah mendapat persetujuan daripada pihak Unit Perancang Ekonomi.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN RUBIAH BINTI HAJI WANG
(KOTA SAMARAHAN)**

TARIKH : 8 MAC 2022 (SELASA)

SOALAN

Minta **MENTERI PEMBANGUNAN USAHAWAN DAN KOPERASI** menyatakan mekanisme yang digunakan pada ketika ini oleh Kementerian dalam menggalakkan keusahawanan dalam kalangan belia dan generasi muda.

JAWAPAN

Tuan Yang Di-Pertua,

Kementerian Pembangunan Usahawan dan Koperasi (MEDAC) telah melaksanakan pelbagai mekanisme untuk menggalakkan keusahawanan dalam kalangan belia dan generasi muda.

Antara mekanisme yang diambil dan dilaksanakan oleh MEDAC menerusi penubuhan Unit PROTEGE yang menggalakkan keusahawanan menerusi penyediaan geran permulaan perniagaan, latihan penempatan kerjaya, latihan serta bimbingan keusahawanan secara dalam talian dan pelaksanaan program berimpak tinggi seperti **Program Latihan Intensif Dalam Talian bagi Usahawan Generasi Baru (N-GENE), Program Latihan Penempatan Kerjaya Bagi Graduan TVET (GRACE), Program Reach Out, Awareness dan Developmental (ROAD) dan Kursus Intrapreneur 101.**

SOALAN NO : 15

Melalui agensi pula, TEKUN Nasional bekerjasama dengan Kementerian Pengajian Tinggi (KPT) bagi pelaksanaan Program KPT-MEDAC Siswapreneur yang menawarkan bantuan pembiayaan sehingga nilai RM5,000. Sasaran program ini adalah golongan pelajar di Institusi Pengajian Tinggi Awam (IPTA), Politeknik dan Kolej Komuniti di seluruh negara menjalankan perniagaan sewaktu dalam pengajian.

Selain itu, bagi memupuk dan membantu usahawan graduan yang telah menamatkan pengajian dan belum mendapat pekerjaan, TEKUN melalui KPT bekerjasama dengan Universiti Kebangsaan Malaysia (UKM) melalui program PENJANA KPT-CAP bagi membimbang seramai 500 orang usahawan graduan dan selepas menamatkan program, peserta akan ditawarkan untuk mendapatkan kemudahan pembiayaan TEKUN Nasional menerusi program pembiayaan sedia ada.

Di bawah Bank Rakyat, **Program Pembiayaan Vendor Umbrella** diperkenalkan di mana belia dan generasi muda perlu mengikuti kursus latihan dan bimbingan oleh vendor selama 3 hingga 6 bulan dan layak menerima pakej pembiayaan tanpa cagaran setelah berjaya menamatkan latihan dan penilaian oleh vendor untuk membuka perniagaan di bawah jenama vendor.

Program Rintis Bank Rakyat UNIpreneur Bank Rakyat pula merupakan program inisiatif kewangan sosial yang akan dilancarkan pada Julai 2022 dengan penglibatan kolaborasi bersama 20 buah universiti tempatan untuk menjana kelestarian ekonomi dan membina kemahiran keusahawanan untuk 300 usahawan mahasiswa berpotensi. Suntikan dana sebanyak RM 2,000 diberikan kepada setiap peserta dengan 6 bulan latihan kemahiran keusahawanan, bimbingan dan pemantauan daripada universiti masing-masing.

Sehingga kini, 70% merupakan usahawan muda menyertai program INSKEN memandangkan INSKEN tiada menghadkan usia untuk setiap penyertaan program. Trend semasa turut mempengaruhi pelaksanaan program-program di INSKEN bagi menarik lebih banyak minat usahawan muda untuk turut serta.

SOALAN NO : 15

SME Corp. Malaysia turut melaksanakan **Program Tunas Usahawan Belia Bumiputera (TUBE)** yang bertujuan untuk melahirkan lebih ramai usahawan belia di seluruh negara. Di bawah program ini, bantuan disediakan bagi pembangunan kapasiti berbentuk latihan, geran permulaan perniagaan dan khidmat nasihat kepada belia Bumiputera yang berumur 18 sehingga 30 tahun. Bagi tahun 2021, sejumlah 1,016 belia Bumiputera telah mendapat manfaat dengan peruntukan diluluskan sebanyak RM13 juta.

Pernas telah melancarkan Projek **Jom Jadi Usahawan Berjaya, Be Your Own Boss (BYOB)** pada awal tahun 2021. BYOB menawarkan 2 program di bawahnya iaitu program “*Successful Women Entrepreneurship Engagement Talent (SWEET)*” bagi golongan wanita dan program “*Young Entrepreneurship Engagement Talent (YOUNITY)*” bagi golongan belia.

Peserta BYOB ditawarkan panduan dan latihan yang berstruktur dan komprehensif (latihan pengurusan kewangan, motivasi dan digitalisasi), padanan perniagaan, pembiayaan serta akses kepada pasaran semasa dan diberi pemantauan selama 6 bulan bermulanya perniagaan.

Sekian, terima kasih.

**TAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN WILLIAM LEONG JEE KEEN
(SELAYANG)**

TARIKH : 8 MAC 2022 (SELASA)

SOALAN

TUAN WILLIAM LEONG JEE KEEN (SELAYANG) minta MENTERI PERUMAHAN DAN KERAJAAN TEMPATAN menyatakan peranan dan fungsi Panel Berkepakaran dan cadangan-cadangan untuk meningkatkan pemilikan rumah, kemampuan, kualiti dan kebolehhunian.

JAWAPAN

Tuan Yang di-Pertua,

Untuk makluman Ahli Yang Berhormat, selaras dengan komitmen Kerajaan untuk mempertingkatkan aspek kebolehcapaian perumahan untuk rakyat, Kementerian telah mengambil keputusan untuk menujuhkan sebuah **Panel Berkepakaran [Panel of Experts (POE)]** bagi membantu, memperkemas dan memperkuuh strategi pelaksanaan Dasar Perumahan Negara (2018-2025).

Panel Berkepakaran (POE) ini dianggotai 25 ahli panel yang terdiri daripada kalangan tokoh perkhidmatan awam/korporat, pemain industri, ahli akademik, wakil media dan Organisasi Bukan Kerajaan (NGO). Setiap seorang ahli panel merupakan individu berpengalaman luas, mempunyai wibawa dan pengetahuan mendalam berkaitan sektor perumahan di Malaysia.

Untuk makluman Ahli Yang Berhormat, antara **terma rujukan** POE ini adalah seperti yang berikut:

- (i) **membantu dan memberi nasihat** kepada KPKT dalam pelbagai isu perumahan;
- (ii) membantu memastikan sektor perumahan mencapai kemajuan yang diharapkan ke arah **perancangan dan pembangunan sektor perumahan yang maju dan berdaya saing** serta menyumbang secara positif kepada pertumbuhan ekonomi negara;
- (iii) Membantu KPKT dalam **merangka strategi ke arah pemilikan kediaman oleh kumpulan sasar atau melalui segmen sewaan kediaman** yang efektif; dan

- (iv) Melihat **isu-isu perumahan mengikut kepakaran dan bidang masing-masing** serta memberi cadangan penyelesaian dan penambahbaikan

Dalam mesyuarat pertama POE yang telah diadakan pada 10 Januari 2022, telah dicadangkan agar Kementerian menubuhkan **Jawatankuasa Kerja Teknikal Perumahan** yang akan dianggotai oleh ahli-ahli POE yang mempunyai kepakaran dan pengetahuan serta para pegawai agensi yang bersesuaian berkaitan isu-isu terlibat.

Jawatankuasa Kerja Teknikal (*Technical Working Group - TWG*) Perumahan ini akan membincangkan isu-isu perumahan secara khusus dan kritikal agar cadangan tindakan dan penyelesaian yang disediakan nanti bersifat komprehensif dan sesuai dilaksanakan. Antara tugas TWG adalah untuk mengkaji isu-isu berkaitan projek terbengkalai, kualiti dan daya huni kediaman, akses kepada pembiayaan dan sebarang isu berkait sektor perumahan.

Kementerian cukup yakin, penubuhan Panel Berkepakaran (Panel of Experts) ini cukup selari dengan komitmen, iltizam dan hasrat Kerajaan untuk memastikan penyediaan rumah kediaman kepada rakyat selaras dengan sasaran “Satu Keluarga Satu Rumah”. Justeru, pelan strategi yang akan dirancang oleh POE akan menekankan konsep 5K iaitu Ketersediaan (availability), Kemampuan (affordability), Kemudahan pembiayaan (accessibility), Kualiti (quality) dan Kediaman berdaya huni (liveability) untuk diterapkan bukan sahaja dalam pembangunan perumahan, malah bagi pembentukan komuniti yang harmoni.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : LISAN

DARIPADA : YB DATO' HJ SALIM SHARIF (JEMPOL)

TARIKH : 8 MAC 2022 (SELASA)

SOALAN

DATUK SERI HAJI MOHD. SALIM SHARIF (JEMPOL) minta **MENTERI DALAM NEGERI** menyatakan strategi dan pelan tindakan secara holistik bagi membanteras kegiatan perjudian atas talian yang semakin serius.

JAWAPAN

Tuan Yang Di Pertua,

Untuk makluman Yang Berhormat, antara tindakan yang telah diambil dan dirancang oleh pihak PDRM termasuklah:

1. Mengadakan operasi dan serbuan secara berterusan melalui Op Dadu termasuklah operasi bersepada dengan kerjasama agensi-agensi lain seperti Suruhanjaya Pencegahan Rasuah Malaysia (SPRM) serta Pihak Berkuasa Tempatan (PBT) untuk melumpuhkan kegiatan ini;
2. Bekerjasama dengan Suruhanjaya Komunikasi Multimedia Malaysia (SKMM) bagi sekatan laman sesawang perjudian di bawah Sek. 263 (2) Akta Komunikasi Multimedia;
3. Bekerjasama dengan syarikat-syarikat utiliti seperti Tenaga Nasional Berhad (TNB) dan syarikat bekalan air untuk tindakan pemotongan

SOALAN NO : 17

bekalan elektrik dan air ke atas premis yang sering digunakan oleh sindiket perjudian;

4. Mengambil tindakan ke atas pihak-pihak yang terlibat dalam kegiatan ini termasuklah penjaga premis dan pengajur kegiatan perjudian haram di bawah peruntukan undang-undang berkaitan judi sedia ada seperti Akta Rumah Judi Terbuka 1957 dan Akta Pertaruhan 1953. Selain itu, tindakan yang lebih keras juga akan diambil di bawah peruntukan undang-undang lain yang berkaitan iaitu Akta Pencegahan Jenayah 1959 (POCA) serta Akta Pencegahan Pengubahan Wang Haram, Pencegahan Pembiayaan Keganasan dan Hasil Daripada Aktiviti Haram (AMLATFPUAA) 2001; dan
5. Meneliti undang-undang berkaitan judi sedia ada bagi tujuan pindaan penambahbaikan bagi memastikan undang-undang ini relevan dengan perubahan modus operandi sindiket perjudian ini terutamanya perjudian atas talian (*online*). Dalam hal ini, Kementerian Dalam Negeri juga telah turut dilibatkan di dalam kajian undang-undang berkaitan perjudian yang sedang dijalankan oleh Kementerian Kewangan Malaysia (MOF) untuk ditambah baik supaya sentiasa selaras dengan perkembangan semasa. Untuk makluman Yang Berhormat juga pindaan akta di bawah Kementerian Kewangan berkaitan hukuman berat dan penalti yang dikenakan kepada operator/pengajur yang tidak dilesenkan dan pemain/punters bagi tujuan membanteras aktiviti perjudian yang tidak dilesenkan dijangka akan dibentangkan pada tahun 2022.

Untuk makluman Yang Berhormat, PDRM menjalankan tindakan siasatan dan penguatkuasaan yang mana pihak SKMM memberikan bantuan teknikal termasuklah pembekalan maklumat bagi tujuan siasatan serta bantuan dari sudut analisis forensik digital. Suruhanjaya Komunikasi dan Multimedia (SKMM) menyekat sebanyak 5,476 laman sesawang perjudian sejak tahun 2016 sehingga 31 Januari 2022. Usaha ini bagi membendung kegiatan tersebut daripada kian menular.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN M. KULASEGARAN [IPOH BARAT]

TARIKH : 8 MAC 2022 (SELASA)

SOALAN

TUAN M. KULASEGARAN [IPOH BARAT] minta **MENTERI KESIHATAN** menyatakan sama ada Kementerian berhasrat untuk mengiktirafkan pekerja pembersihan hospital sebagai pekerja sepenuh masa. Jika tidak apakah sebab- sebabnya.

JAWAPAN

Tuan Yang di-Pertua,

1. Konsesi Perkhidmatan Sokongan Hospital (PSH) telah dilaksanakan sejak bulan Oktober 1996 sehingga kini. Perjanjian Konsesi sedia ada akan tamat pada bulan Mac 2025. Konsesi PSH melibatkan 148 hospital/ institusi di seluruh negara.
2. Salah satu perkhidmatan yang dilaksanakan oleh syarikat konsesi adalah perkhidmatan pembersihan yang mana syarikat konsesi menguruskan pengambilan pekerja pembersihan, penyediaan *consumables* dan sebagainya. Memandangkan kerja-kerja pembersihan ini telah diswastakan, maka semua jawatan berkaitan kerja-kerja pembersihan telah dijumudkan dalam perkhidmatan awam.
3. Kementerian Kesihatan secara keseluruhannya tidak terlibat dalam urusan pemilihan sub-kontraktor dan pekerja pembersihan memandangkan kontrak yang ditandatangani adalah antara Kerajaan dengan syarikat induk. Ini termasuk penetapan gaji pekerja, bilangan pekerja, bilangan syif dan sebagainya. Perkara-perkara tersebut ditentukan oleh syarikat induk dengan sub-kontraktor berdasarkan kepada keperluan di hospital/institusi terbabit.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK WILSON UGAK ANAK KUMBONG
(HUJU RAJANG)**

TARIKH : 8 MAC 2022 (SELASA)

SOALAN

DATUK WILSON UGAK ANAK KUMBONG (HUJU RAJANG) minta **MENTERI PEMBANGUNAN LUAR BANDAR** nyatakan sekiranya pihak kementerian bercadang untuk membina jalan dari Rumah Timothy Balai/Rh Ason ke SK Nanga Tiau, Hulu Mujong terus ke daerah Bukit Mujong terus ke daerah Bukit Mabong, Bahagian Kapit.

JAWAPAN

Tuan Yang di-Pertua,

Untuk makluman Yang Berhormat, Projek Membina Jalan Dari Rumah Timothy, Nanga Mujong Ke SK Nanga Tiau, Sg Mujong, Kapit, Sarawak telah dimohon di bawah *Rolling Plan* Kedua, Rancangan Malaysia Kedua Belas (RP2, RMKe-12) Tahun 2022. Skop projek yang dimohon adalah Membina Jalan Sepanjang 22km Dengan Standard JKR R1 dan 4 Buah Jambatan. Walau bagaimanapun, projek ini tidak tersenarai dalam projek yang diluluskan oleh Unit Perancang Ekonomi, Jabatan Perdana Menteri dalam Bajet 2022.

Kementerian ini akan mengangkat semula permohonan projek ini untuk dipertimbangkan semula dalam RP-3, RMKe-12, Tahun 2023.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : LISAN

**DARIPADA : YB TUAN DR. MASZLEE B. MALIK
(SIMPANG RENGGAM)**

TARIKH : 8 MAC 2022 (SELASA)

SOALAN

DR. MASZLEE BIN MALIK (SIMPANG RENGGAM) minta MENTERI DALAM NEGERI menyatakan :-

(a) usaha menaik taraf Balai Polis Simpang Renggam dari kekuatan anggota dan juga aset selari dengan pertambahan penduduk di Kawasan tersebut; dan

(b) usaha penyelenggaraan kuarters anggota dan pegawai di kem Pasukan Gerak Am (PGA) Batalion ke-5 di Simpang Renggam dan usaha penyelenggaraan kuarters anggota dan pegawai Penjara Simpang Renggam.

JAWAPAN

Tuan Yang Di Pertua,

Kementerian sentiasa mengkaji keperluan menaik taraf balai-balai polis di seluruh negara termasuk di kawasan Parlimen Simpang Renggam yang dinyatakan atas justifikasi keluasan kawasan serta pembangunan setempat. Pada masa ini, Balai Polis Simpang Renggam mempunyai kekuatan seramai 28 anggota yang diketuai oleh seorang Ketua Polis Balai berpangkat Sarjan Mejar. Kawasan pentadbiran Balai Polis berkenaan adalah seluas 248 kilometer persegi dengan anggaran penduduk seramai 47,583 orang (Banci 2020). Pihak Kementerian dengan kerjasama Ibu Pejabat Polis Kontinjen (IPK) Johor dan PDRM Bukit Aman sedang meneliti kekuatan anggota di balai-balai seluruh Johor bagi mengenalpasti keperluan pertambahan jawatan serta pertambahan aset yang sesuai untuk kegunaan penugasan harian pegawai/anggota di lapangan.

Tuan Yang Di Pertua,

Bagi menjawab soalan berkaitan penyelenggaraan kuarters di **Pasukan Gerakan Am (PGA) Batalion 5 Simpang Renggam** dan **Penjara Simpang Renggam** pula, untuk makluman Yang Berhormat, pada tahun 2021, peruntukan sebanyak RM89,940.00 telah disalurkan bagi kerja-kerja penyelenggaraan manakala pada tahun 2022 pula, kelulusan peruntukan keseluruhan sebanyak RM210,000.00 diberi untuk pelaksanaan kerja-kerja pembaikan dan penyelenggaraan kuarters kem Pasukan Gerakan Am (PGA) Batalion 5 Simpang Renggam.

Bagi tahun 2022, Pihak Briged Tengah PGA menerima sejumlah RM420 ribu di bawah OS 28000 bagi kerja-kerja pembaikan di Batalion 5 PGA Simpang Renggam. Sejumlah RM90,000.00 diperuntukkan bagi kerja-kerja pembaikan kuarters dan fasiliti melibatkan kuarters pegawai dan anggota. Kerja-kerja pembaikan melibatkan (7) unit kediaman pegawai kanan kelas 'D' dan 'E' serta (50) unit kediaman Pegawai Rendah Polis kelas 'F' yang mengalami kerosakan serta pembaikan sistem perpaipan.

Untuk makluman Yang Berhormat, **Jabatan Penjara Malaysia** melalui Kementerian Dalam Negeri sentiasa menjaga kebajikan pegawai dan kakitangan penjara termasuk memastikan keselesaan kuarters. Sememangnya terdapat keperluan bagi penambahbaikan kuarters-kuarters yang sedia ada dan Jabatan Penjara Malaysia sedang melaksanakan kerja-kerja pembaikan dan menaiktaraf kuarters secara berperingkat berdasarkan ketersediaan peruntukan Jabatan.

Menyedari keperluan untuk pembaikan dan penyelenggaran kuarters tersebut, Jabatan Penjara Malaysia khususnya di Penjara Simpang Renggam telah diluluskan sebanyak RM4.3 juta di bawah Projek Fizikal Rancangan Malaysia Ke-12 (RP 2) tahun 2022 dan Belanja Mengurus (OE) tahun 2022, Jabatan Penjara Malaysia.

Daripada jumlah tersebut, sebanyak RM4.2 juta telah diluluskan di bawah Projek Fizikal Rancangan Malaysia Ke-12 (RP 2) tahun 2022 untuk kerja-kerja menaiktaraf sistem kumbahan di kuarters Penjara Simpang Renggam.

Manakala bakinya sebanyak RM100 ribu lagi telah diperuntukkan bagi kerja-kerja pembaikan kuarters kakitangan Penjara Simpang Renggam.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : JAWAB LISAN

DARIPADA : DATO' SRI HASAN BIN ARIFIN [ROMPIN]

TARIKH : 08 MAC 2022 (SELASA)

SOALAN

DATO' SRI HASAN BIN ARIFIN [ROMPIN] minta **MENTERI SUMBER MANUSIA** menyatakan apakah situasi semasa kadar pengangguran terkini sejak negara beralih ke Fasa 4 Pelan Pemulihan Negara (PPN) dan apakah statistik terkini kadar guna tenaga. Nyatakan juga sektor yang mencatatkan kadar guna tenaga tertinggi dan resolusi Kerajaan dalam menurunkan lagi kadar pengangguran semasa.

JAWAPAN

Tuan Yang Di Pertua,

Berdasarkan Survei Tenaga Buruh oleh Jabatan Perangkaan Malaysia, kadar pengangguran Malaysia telah menurun kepada 4.3% pada suku tahun keempat 2021 berbanding suku tahun ketiga 2021 iaitu 4.7%.

Laporan Produktiviti Buruh pada Suku Tahun Keempat 2021 merekodkan jumlah penduduk bekerja di Malaysia seramai 15.4 juta orang. Sektor Perkhidmatan mencatatkan kadar guna tertinggi iaitu 61.2%.

Bagi mengurangkan kadar pengangguran, Kerajaan melalui agensi-agensi dibawahnya telah melaksanakan beberapa inisiatif antaranya

SOALAN NO : 21

adalah program **JaminKerja-Insentif Penggajian** di bawah Sistem Insurans Pekerjaan yang dijangka akan memanfaatkan 300,000 pencari kerja dari seluruh negara.

Program Perantisan, JaminKerja-Insentif Penggajian dimana pemberian insentif RM900 sebulan untuk tempoh enam bulan diberikan kepada majikan yang mengajikan golongan perantis lepasan sekolah dan graduan berumur 18 hingga 30 tahun dalam jawatan Eksekutif.

Selain itu, beberapa program lain yang dilaksanakan bagi menggalakkan penyertaan tenaga kerja seperti Program Karnival Kerjaya, Program Insentif Pengambilan Pekerja, program latihan kemahiran semula dan peningkatan kemahiran melalui Penyedia Latihan yang dilantik.

Skim-skim seperti **Place & Train, B40 Development, SME Development, Industrial Revolution 4.0** dan Gerak Insan Gemilang, diwujudkan untuk membantu rakyat mendapat penempatan pekerjaan, *self-employed* serta menambah dan meningkatkan kemahiran mereka.

Kerajaan dari semasa ke semasa juga akan mewujudkan lebih banyak program bagi membantu rakyat mendapatkan pekerjaan seterusnya mengurangkan kadar pengangguran.

**PEMBERITAHUAN PERTANYAAN JAWAB LISAN DEWAN
RAKYAT MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' JOHARI BIN ABDUL
[SUNGAI PETANI]**

TARIKH : 8 MAC 2022 (SELASA)

SOALAN

DATO' JOHARI BIN ABDUL [SUNGAI PETANI] minta **MENTERI BELIA DAN SUKAN** menyatakan apakah perancangan Kementerian bagi memastikan persatuan-persatuan belia hidup dan aktif di setiap daerah. Dengan aktifnya belia-belia di akar umbi akan melahirkan pemimpin yang layak dan berkualiti dalam semua bidang, ekonomi, sosial dan politik.

JAWAPAN

Tan Sri Yang Di Pertua,

Untuk makluman Ahli Yang Berhormat, Kementerian Belia dan Sukan melalui Jabatan Belia dan Sukan Negara sentiasa komited dalam memastikan pertubuhan-pertubuhan belia untuk terus aktif di setiap daerah di seluruh negera. Ini adalah untuk memastikan kelangsungan pertubuhan belia agar kekal aktif dan menyumbang kepada pembangunan kepimpinan belia, pembangunan kesukarelawanan, modal insan, sosial, ekonomi dan politik yang sekaligus dapat membentuk karakter belia yang unggul di peringkat akar umbi.

Kementerian telah merangka beberapa inisiatif kepada pertubuhan-pertubuhan belia bagi menggerakkan mereka secara aktif di peringkat akar umbi, daerah dan negeri. Inisiatif yang telah dirancang antaranya

SOALAN NO : 22

melibatkan bantuan peruntukan pelaksanaan program, hubungan kerjasama strategik dalam pelaksanaan program, dan pengukuhan kepimpinan.

Pada tahun ini Kementerian telah merancang untuk merancakkan lagi kerjasama strategik ini melalui lebih 300 program. Antara program utama yang telah dirancang pada tahun ini bagi merancakkan aktiviti belia dan sukan dengan kerjasama erat antara Kementerian dan pertubuhan. Antara Persatuan/Kelab yang terlibat dalam kerjasama tersebut adalah Program Kesukarelawanan mempunyai 300 Pertubuhan/Kelab yang melibatkan penyertaan dari 10,000 peserta, Program Malaysia Sports League (MSL) mempunyai 138 Pertubuhan/Kelab yang melibatkan penyertaan dari 133,000 peserta dan Program 1000 Liga mempunyai 187 Pertubuhan/Kelab yang melibatkan penyertaan dari 77,000 peserta.

Untuk makluman, terdapat hampir 10,000 persatuan belia yang aktif berdaftar di bawah Pejabat Pendaftar Pertubuhan Belia (ROY) manakala terdapat lebih 11,000 persatuan sukan yang aktif berdaftar di bawah Pejabat Pesurujaya Sukan (PJS). Sehubungan itu, kerjasama strategik yang dilaksanakan secara bersama ini antara lainnya adalah bertujuan untuk mengaktifkan semula persatuan-persatuan belia yang tidak aktif.

Selain itu, bagi memberi penghargaan kepada persatuan-persatuan belia yang aktif di pelbagai peringkat, pertubuhan-pertubuhan ini berpeluang untuk diberikan pengiktirafan melalui pertandingan Anugerah Perdana Belia Negara dalam Kategori Pertubuhan Belia. Anugerah ini adalah bagi memberi penghargaan kepada pertubuhan belia yang menunjukkan potensi dan prestasi yang cemerlang dalam menyumbang kepada pembangunan negara.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN HAJAH NATRAH BINTI ISMAIL
(SEKIJANG)**

TARIKH JAWAB : 8 MAC 2022 (SELASA)

SOALAN

PUAN HAJAH NATRAH BINTI ISMAIL (SEKIJANG) minta **MENTERI PERUMAHAN DAN KERAJAAN TEMPATAN menyatakan statistik terkini rumah yang tidak terjual di seluruh negara dan apakah perancangan Kementerian dalam mengawal peningkatan harga rumah agar ianya tidak membebankan rakyat.**

JAWAPAN

Tuan Yang di-Pertua,

Terima kasih atas keprihatinan Ahli Yang Berhormat **mengenai masalah lambakan rumah tidak terjual (overhang)** yang berlaku di negara ini. Kementerian Perumahan dan Kerajaan Tempatan (KPKT) mengambil berat mengenai perkara ini dan berusaha untuk menyelesaikannya bersama semua pihak yang terlibat.

Berdasarkan kepada laporan Status Pasaran Harta Tanah oleh **Pusat Maklumat Harta Tanah Negara (NAPIC)**, bagi suku kedua tahun 2021 (**Q2, 2021**) terdapat **31,112 unit** rumah siap dibina tidak terjual yang **bernilai RM20.1 bilion**. Bagi suku ketiga tahun 2021 (**Q3, 2021**), terdapat **30,290 unit** rumah siap dibina tidak terjual yang **bernilai RM19.75 bilion**. Ini menunjukkan terdapat **penurunan sebanyak 2.64%** dalam bilangan unit rumah tidak terjual **dan 1.74%** dalam nilai bagi suku tahun ketiga berbanding suku kedua tahun 2021. Justeru, terdapat **penurunan kadar lambakan** rumah yang tidak terjual walaupun tidak ketara. Ini dibuktikan dengan penurunan **Indeks Harga Rumah** pada suku ketiga 2021 (198.6 mata) berbanding suku ketiga 2020 (199.9 mata) yang menunjukkan **penurunan sebanyak 0.7%**.

Untuk makluman Ahli Yang Berhormat juga, dalam prinsip ekonomi yang sihat, produk yang dibekalkan ke pasaran seharusnya berdasarkan penawaran dan permintaan (*supply and demand*). Walau bagaimanapun, senario kini melihat pemaju membekalkan banyak kategori rumah di pasaran dan tidak menumpu kepada Rumah Mampu Milik (RMM) sahaja.

Antara langkah utama yang sedang diambil bagi mengurangkan ketidaksepadanan penawaran dan permintaan (*supply and demand*) dalam industri perumahan adalah:

- i. memperkenalkan peraturan/garis panduan kepada para pemaju perumahan untuk mengemukakan kajian kebolehlaksanaan (*feasibility study*) semasa memohon Kebenaran Merancang (KM). Hasil kajian ini dapat membantu mengelak daripada berlakunya sebarang pembangunan perumahan yang tidak sesuai dengan permintaan pasaran; dan
- ii. membangunkan sistem Analisis Data Raya (*Big Data Analytics*; BDA) Perumahan bagi mendapatkan gambaran sebenar kedudukan dan ketersediaan data berkaitan sektor perumahan di Malaysia. Untuk makluman Ahli Yang Berhormat, kajian ini telah dimulakan pada bulan Februari 2021.

KPKT sedang menyediakan pemetaan RMM berdasarkan pendapatan median mengikut negeri dan daerah yang diperolehi daripada laporan Survei Pendapatan Isi Rumah dan Kemudahan Asas 2019 yang dikeluarkan oleh Jabatan Perangkaan Malaysia (DOSM). Kaedah ini menggunakan median pendapatan rakyat mengikut daerah bagi kaedah pengukuran RMM berdasarkan metodologi gandaan median (*median multiple*). Pemetaan ini adalah bagi membantu pemaju mengenal pasti harga jualan rumah yang sesuai di sesebuah lokaliti.

KPKT telah mengadakan Mesyuarat Majlis Perumahan Mampu Milik Negara (MPMMN) Bilangan 1 Tahun 2022 yang dipengerusikan oleh YAB Perdana Menteri pada 10 Februari 2022. MPMMN merupakan sebuah platform bagi membincangkan dan menyelaras hala tuju perancangan, pelaksanaan serta pemantauan penyediaan RMM di seluruh negara selaras dengan matlamat Satu Keluarga Satu Rumah.

Dalam mesyuarat tersebut, isu berkenaan kenaikan kos bahan binaan dalam industri pembinaan telah dibangkitkan dan dibincangkan. YAB Perdana Menteri telah mengarahkan KPKT dan Persatuan Pemaju

SOALAN NO : 23

Hartanah dan Perumahan Malaysia (REHDA) untuk meneliti sekiranya masalah peningkatan kos bahan binaan dan kartel dalam industri pembinaan berpunca daripada Permit Import (AP). Sehubungan itu, satu mesyuarat susulan bagi membincangkan isu kenaikan kos bahan binaan dalam industri pembinaan telah diadakan pada 14 Februari 2022. Mesyuarat ini turut melibatkan agensi-agensi seperti Kementerian Perdagangan Antarabangsa dan Industri (MITI), Kementerian Perdagangan Dalam Negeri dan Hal Ehwal Pengguna (KPDNHEP), Kementerian Kerja Raya (KKR), Kementerian Kewangan (MOF), Jabatan Kerja Raya (JKR), Lembaga Pembangunan Industri Pembinaan Malaysia (CIDB), Suruhanjaya Persaingan Malaysia (MyCC), Persatuan Pemaju Hartanah dan Perumahan Malaysia (REHDA) dan lain-lain lagi.

Mesyuarat telah bersetuju agar CIDB dan KKR mengkaji kos terperinci rantaian bekalan bahan binaan bagi mengurangkan jurang harga di antara harga pengeluar dengan kontraktor. Seterusnya, mesyuarat berpendapat kontraktor boleh memanfaatkan insentif yang disediakan oleh MOF bagi syarikat yang menjalankan aktiviti dalam pembuatan Sistem Bangunan Industri (IBS).

Sekian, terima kasih.

**PEMBERITAHUAN PERTANYAAN BERTULIS DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK ROBERT LAWSON CHUAT
[BETONG]**

TARIKH : 08 MAC 2022 (SELASA)

SOALAN

DATUK ROBERT LAWSON CHUAT [BETONG] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah perancangan Kementerian dalam membantu industri kecantikan mendapat tempat dan keyakinan dalam kalangan pengguna.

JAWAPAN

Yang di-Pertua,

Berdasarkan kepada Statistik Ekonomi Tahunan 2018 (Perkhidmatan Persendirian dan Lain-Lain Aktiviti), industri ini menunjukkan kadar pertumbuhan tahunan sebanyak 5.4% iaitu RM5.8 bilion pada tahun 2018 berbanding RM5.2 bilion pada tahun 2015. Bilangan pekerja industri kecantikan juga meningkat pada tahun 2018 berbanding 2015 iaitu daripada 85,215 orang kepada 88,805 orang dengan kadar pertumbuhan sebanyak 2.1%.

Sehubungan dengan itu, KPDNHEP sedang dalam tindakan menyemak semula dan membuat penambahbaikan terhadap Garis Panduan Industri Kecantikan yang dikeluarkan pada tahun 2013 dengan mengadakan beberapa sesi libat urus dengan beberapa pemain industri dan pihak Kementerian Kesihatan Malaysia (KKM) sepanjang tahun 2021 dan akan diteruskan lagi pada tahun 2022.

Cadangan penambahbaikan Garis Panduan Industri Kecantikan ini adalah selaras dengan ketetapan pihak KPDNHEP untuk melihat semula pembangunan industri kecantikan berdasarkan kepada peraturan dan perundangan di bawah skop bidang kuasa Kementerian ini. Pihak KPDNHEP juga komited dan mengalu-alukan sebarang cadangan penambahbaikan dan akan diperhalusi oleh pihak Kementerian secara menyeluruh dengan penglibatan sesi libat urus dengan semua pihak berkepentingan seperti Kementerian Kesihatan Malaysia (KKM), Jabatan Tenaga Kerja (JTK), Pertubuhan Bukan Kerajaan (NGO), pemain industri dan sebagainya dalam usaha memastikan industri kecantikan dapat berkembang dengan pesat selari dengan perkembangan di peringkat global.

Sekian, terima kasih.

SOALAN NO : 25

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : LISAN

**DARIPADA : YB TUAN SANISVARA NETHAJI RAYER A/L
RAJAJI (JELUTONG)**

TARIKH : 8 MAC 2022 (SELASA)

SOALAN

TUAN SANISVARA NETHAJI RAYER A/L RAJAJI (JELUTONG) minta **MENTERI DALAM NEGERI** menyatakan apakah sebabnya rombongan eskot keselamatan dan kenderaan Perdana Menteri diberi keutamaan berbanding ambulans yang bergegas untuk membawa seorang pesakit.

JAWAPAN

Tuan Yang Di Pertua,

Seksyen 21 Akta Polis 1967 [Akta 344] memperuntukkan Pegawai Polis diberi kuasa mengatur, mengawal dan melencongkan mana-mana lalulintas termasuk menjalankan tugas iring kawal keselamatan di jalan-jalan awam dalam menjalankan tugas iring kawal keselamatan. Elemen-elemen Polis Diraja Malaysia (PDRM) diatur gerak mengikut tahap keselamatan yang diperlukan contohnya iring kawal bahan berbahaya, bahan letupan, senjata api, banduan, kenamaan-kenamaan, vaksin dan lain-lain mengikut garis panduan (SOP) yang ditetapkan.

Dalam memastikan tahap keselamatan berada pada tahap tinggi, petugas iring kawal akan bertindak mengikut peruntukan di bawah Seksyen 21 Akta Polis 1967 [Akta 344]. Walaupun demikian, pegawai/anggota PDRM yang bertugas mengawal lalulintas perlu seberapa segera memberi keutamaan dan laluan kepada kenderaan kecemasan seperti Ambulans dan Bomba sepetimana yang ditetapkan Kaedah 9, Kaedah-Kaedah Lalulintas Jalan 1959 [LN 166/59].

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : DATO' MOHD. NIZAR BIN HAJI ZAKARIA [PARIT]

TARIKH : 8 MAC 2022 (SELASA)

SOALAN

DATO' MOHD. NIZAR BIN HAJI ZAKARIA [PARIT] minta MENTERI KESIHATAN menyatakan :-

- (a) berapa statistik bagi ubat-ubatan tradisional yang berdaftar dengan Kementerian Kesihatan; dan
- (b) apakah faktor yang menyebabkan sesuatu ubat-ubatan tradisional tidak dibenarkan untuk didaftarkan walaupun menggunakan bahan semulajadi.

JAWAPAN

Tuan Yang di-Pertua,

1. Produk tradisional perlu berdaftar dengan Pihak Berkuasa Kawalan Dadah (PBKD) sebelum ia boleh dijual di pasaran awam bagi memastikan hanya produk yang berkualiti dan selamat sahaja digunakan oleh orang ramai.
2. Secara purata, sebanyak 600 hingga 700 produk didaftarkan setiap tahun sejak 2017 hingga 2021. Mengikut rekod KKM setakat ini,

sebanyak 27,533 produk ubat-ubatan tradisional telah didaftarkan dengan PBKD.

3. Terdapat beberapa faktor yang menyebabkan sesuatu ubat-ubatan tradisional tidak dibenarkan untuk didaftarkan walaupun menggunakan bahan-bahan semulajadi seperti berikut:

- (i) **Produk tradisional yang mengandungi bahan aktif yang tersenarai dalam Akta Racun 1952.** Sebagai contoh, bahan aktif herba ephedra adalah tersenarai di bawah Senarai Racun (*Poisons List*), Akta Racun 1952. Sehubungan itu, apa-apa persediaan selain daripada *raw herb* yang mengandungi racun ini adalah dikawal sebagai racun di bawah Akta Racun 1952 dan tidak dibenarkan dalam ubat tradisional.
- (ii) **Produk tradisional yang mengandungi bahan aktif yang dilaporkan menyebabkan sebarang kesan sampingan kepada manusia.** Memandangkan aspek keselamatan adalah elemen utama semasa proses penilaian pendaftaran produk, mana-mana bahan aktif herba semulajadi yang diketahui atau dilaporkan menyebabkan kesan sampingan kepada manusia adalah tidak dibenarkan untuk didaftarkan. Contohnya, bahan aktif herba *Aristolochia* merupakan herba yang tersenarai dalam senarai bahan aktif terlarang dalam *Drug Registration Guidance Documents* (DRGD) disebabkan kesan advers ketoksikan buah pinggang.
- (iii) **Produk tradisional yang mengandungi bahan aktif dari spesies hidupan liar dan botani yang terlindung / terancam.** Sebagai contoh, produk tradisional yang mengandungi bahan aktif dari harimau dan badak sumbu adalah tidak dibenarkan memandangkan spesies haiwan ini adalah dilindungi dibawah Akta Pemuliharaan Hidupan Liar 2010 [Akta 716] dan Akta Perdagangan Antarabangsa Mengenai Spesies Terancam 2008 [Akta 686].
- (iv) **Produk tradisional yang mengandungi gabungan bahan semulajadi dengan bahan kimia atau bahan sintetik**

dengan kesan terapeutik. Berdasarkan definisi ubat tradisional di bawah Peraturan-Peraturan Kawalan Dadah dan Kosmetik 1984, produk tradisional tidak dibenarkan mengandungi bahan kimia (*Traditional medicine shall not include any sterile preparation, vaccine, any substance derived from human parts, any isolated and characterized chemical substances*). Sebagai contoh, produk tradisional yang mengandungi ‘menthol’ sebagai bahan aktif.

- (v) **Produk tradisional dengan tuntutan selain tuntutan tradisional.** Produk tradisional tersebut membuat tuntutan yang tersenarai sebagai tuntutan yang tidak dibenarkan untuk produk-produk tradisional, seperti yang termaktub di bawah Akta Ubat Iklan dan Penjualan 1956. Sebagai contoh, ubat-ubatan tradisional yang membuat tuntutan boleh menyembuhkan penyakit diabetes dan kanser.
 - (vi) Produk tradisional yang **gagal mengemukakan rujukan** bagi bahan aktif herba tersebut untuk menyokong dos dan tuntutan indikasi sepetimana kebiasaannya terkandung dalam dokumen *Pharmacopoeia* atau mana-mana rujukan.
 - (vii) Produk tradisional yang tidak dikilangkan di premis yang mempunyai Sijil Amalan Perkilangan Baik (APB).
4. Kementerian Kesihatan Malaysia sentiasa memastikan produk-produk tradisional mematuhi keperluan aspek keselamatan dan kualiti dengan tujuan utama bagi melindungi dan menjamin kesihatan rakyat.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : **LISAN**

DARIPADA : **TUAN SIVAKUMAR VARATHARAJU
NAIDU [BATU GAJAH]**

TARIKH : **8 MAC 2022 (SELASA)**

SOALAN

TUAN SIVAKUMAR VARATHARAJU NAIDU minta **MENTERI KESIHATAN** menyatakan status terbaru Kerangka Kerja Kebangsaan Penyakit Jarang Jumpa. Sejauh manakah jawatankuasa tadbir urus penyakit jarang jumpa memainkan peranan dalam advokasi pendidikan kesihatan kepada orang awam, saringan dan diagnosis pesakit jarang jumpa. Apakah pencapaian rancangan jangka pendek dan jangka panjang Kementerian dalam menguruskan isu penyakit jarang jumpa di negara kita.

JAWAPAN

Tuan Yang di-Pertua,

1. Pada September 2019, Kementerian Kesihatan Malaysia (KKM) melalui Jawatankuasa Penyakit Jarang Jumpa Kebangsaan telah mewujudkan **Kerangka Kebangsaan Berkaitan Penyakit Jarang Jumpa** di Malaysia dengan objektif utamanya sebagai satu tadbir urus (*governance committee*) bagi mengintegrasikan pengurusan Penyakit Jarang Jumpa di Malaysia.
2. Integrasi pengurusan Penyakit Jarang Jumpa ini mempunyai 4 komponen utama iaitu:

- (i) advokasi, pendidikan kesihatan dan saringan kepada orang awam;
- (ii) pendiagnosan pesakit dan pengurusan klinikal; dan
- (iii) sistem rujukan, pengumpulan data dan penyelidikan.

3. Daripada segi advokasi dan pendidikan kesihatan, sempena *World Rare Disease Day* pada 28 Februari tahun ini, pelbagai aktiviti telah dilaksanakan seperti:

- (i) Kapsul MyHealth ~ Rare Disease;
- (ii) penghasilan Video ~ Rare Disease;
- (iii) penulisan dan terbitan artikel di E-Magazine MyHealth;
- (iv) infografik di media sosial rasmi KKM;
- (v) program amal berbasikal "*Ride With Hope ~ Miku Challenge*" di Rembau, Negeri Sembilan; dan
- (vi) Majlis Perasmian Perhimpunan Keluarga dan Persidangan Penyakit Jarang Jumpa Malaysia 2022

4. Manakala daripada segi pengagihan peruntukan, tambahan RM1 juta telah diperuntukkan kepada Makmal Genetik Hospital Tunku Azizah Kuala Lumpur pada tahun ini untuk memantapkan lagi ujian makmal bagi golongan pesakit ini.

5. Selain itu, pada Februari 2022, Kementerian Kesihatan telah pun menghasilkan satu lagi kerangka untuk penilaian rawatan menggunakan pendekatan menyeluruh dan pelbagai kriteria secara *multiple criteria decision analysis* (MCDA) bagi memastikan ketelusan pengagihan peruntukan kewangan dan pembuatan keputusan yang lebih baik.

Tuan Yang di-Pertua,

6. Kementerian Kesihatan telah membangunkan **Pelan Strategik Program Penyakit Jarang Jumpa di Malaysia** untuk merancang polisi, program, strategi dan intervensi melalui 4 komponen berikut:

- (i) Pencegahan (*preventive*);
- (ii) Rawatan (*curative*) – pengurusan klinikal, makmal, *Orphan*

Drugs dan Orphan Products;

- (iii) Rehabilitasi dan sokongan penjagaan sosial; dan
- (iv) Pengumpulan data dan penyelidikan.

7. Pelan Strategik ini dibahagikan kepada 3 fasa:

- (i) jangka pendek (tahun 2020 – 2021);
- (ii) jangka pertengahan (tahun 2022 - 2023); dan
- (iii) jangka panjang (tahun 2024 – 2030).

8. Tiga (3) sasaran utama dalam fasa jangka pendek tahun 2020 – 2021 yang telah berjaya dicapai adalah:

- (i) Malaysia mempunyai definisi Penyakit Jarang Jumpa,
- (ii) telah membangunkan garis panduan untuk memudahkan cara akses kepada ubat-ubatan Orphan melalui *Malaysia Orphan Medicine Guideline*; serta
- (iii) telah membangunkan 500 kes penyakit jarang jumpa yang juga disenaraikan dalam *Malaysian Rare Disease List*. Senarai ini boleh dirujuk di dalam laman sesawang Kementerian Kesihatan Malaysia.

9. Bagi fasa pertengahan (tahun 2022 – 2023), Kementerian sedang membangunkan satu polisi, serta menambah baik senarai Penyakit Jarang Jumpa. Selain itu, satu Tabung Amanah Penyakit Jarang Jumpa akan diwujudkan dengan kerjasama persatuan-persatuan pesakit bagi memastikan kelestarian peruntukan kewangan. Disamping itu, KKM juga sedang membangunkan Pangkalan Data Penyakit Jarang Jumpa yang dijadualkan dilaksanakan di dalam Rancangan Malaysia Keduabelas (RMKe-12).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SYED ABU HUSSIN BIN
HAFIZ SYED ABDUL FASAL (BUKIT GANTANG)**

TARIKH : 8 MAC 2022 (SELASA)

SOALAN

DATO' SYED ABU HUSSIN BIN HAFIZ SYED ABDUL FASAL (BUKIT GANTANG) minta **MENTERI PERUMAHAN DAN KERAJAAN TEMPATAN** menyatakan kesan daripada pelaksanaan Perintah Kawalan Pergerakan (PKP), berapa lamakah lagi tempoh yang akan diambil bagi menyiapkan Balai Bomba Trong. Berapakah bilangan kekuatan Anggota dan Pegawai Bomba yang akan ditempatkan di sini serta radius kilometer yang menjadi kawasan-kawasan tanggungjawab Balai Bomba Trong.

JAWAPAN

Tuan Yang di-Pertua,

Untuk makluman Ahli Yang Berhormat, Balai Bomba dan Penyelamat (BBP) Trong, Perak merupakan balai bomba kategori D yang telah diluluskan dalam Rancangan Malaysia Kesebelas (RMKe-11), *Rolling Plan* Kedua (RP2) Tahun 2017 dengan kos projek sebanyak RM3.675 juta. Pada masa kini, kerja-kerja penyiapan balai bomba telah berada pada tahap 74.97% kemajuan sebenar di tapak berbanding 71% mengikut jadual (**prestasi kemajuan fizikal mendahului jadual**). Berdasarkan kepada perancangan semasa, pembinaan balai bomba tersebut dijangka **siap sepenuhnya pada 12 Mei 2022**.

Sebaik siap pembinaan, BBP Trong akan beroperasi dengan kekuatan keanggotaan seramai 28 orang yang terdiri daripada 4 pegawai dan 24 orang anggota pelbagai gred yang akan dilengkapi dengan sebuah jentera *Fire Rescue Tender* (FRT), kenderaan utiliti serta bot penyelamat. Radius kawasan jagaan balai bomba tersebut adalah sejauh 13 kilometer yang melibatkan kawasan Changkat Ibol di bahagian utara hingga ke kawasan Batu Hampar di bahagian selatan.

Pada masa yang sama juga, kawasan Trong kini mendapat bantuan khidmat kebombaan daripada Pasukan Bomba Sukarela (PBS) yang berdekatan iaitu PBS Kuala Sepetang dengan jarak 24 kilometer yang mengambil masa 30 minit untuk sampai. PBS Kuala Sepetang ini mempunyai kekuatan keanggotaan seramai 59 orang ahli yang telah dibekalkan dengan kenderaan bomba sukarela, kelengkapan peralatan perlindungan diri (PPE) dan peralatan asas pemadam kebakaran oleh Jabatan Bomba dan Penyelamat (JBPM) Negeri Perak. Pihak Kementerian melalui JBPM menggalakkan komuniti setempat di kawasan Trong untuk turut sama menubuhkan PBS dalam melengkapkan aspek keanggotaan pasukan penyelamat dan juga aspek bantuan logistik sekiranya berlaku sebarang insiden atau bencana yang lebih serius. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : DATUK SERI HAJI AHMAD BIN HAJI MASLAN [PONTIAN]

TARIKH SOALAN : 8 MAC 2022 (SELASA)

SOALAN

Minta **MENTERI PEMBANGUNAN USAHAWAN DAN KOPERASI** menyatakan bukti-bukti kejayaan membangunkan usahawan dan nyatakan perancangan untuk membina usahawan muda dan wanita termasuk mereka yang hanya memiliki sijil SPM dan mereka yang sudah memiliki ijazah.

JAWAPAN

Tuan Yang di-Pertua,

Kementerian Pembangunan Usahawan dan Koperasi (MEDAC) bersama agensinya sentiasa komited untuk membantu dan membangunkan usahawan. Pada tahun 2021, bukti-bukti kejayaan yang dilakar oleh MEDAC dalam pembangunan usahawan adalah:

- (i) Memulihkan seramai 247,858 usahawan dan koperasi yang terjejas melalui bantuan pembiayaan, geran, moratorium dan diskaun sewaan premis perniagaan. Sebanyak 26 program telah dilaksanakan dengan jumlah dana sebanyak RM7.45 bilion;
- (ii) Membantu seramai 3,996 orang menceburi bidang keusahawanan dari kumpulan belia, graduan dan juga mereka

SOALAN NO : 29

yang telah hilang pekerjaan. Sebanyak 15 program telah dilaksanakan dengan jumlah dana sebanyak RM32.98 juta; dan

- (iii) Mengukuhkan daya tahan 9,318 perusahaan mikro kecil dan sederhana (PMKS) melalui adaptasi teknologi. Sebanyak 10 program telah dilaksanakan dengan jumlah dana sebanyak RM12.39 juta.

Seterusnya, bagi melonjakkan pembangunan usahawan belia dan wanita pada tahun 2022, MEDAC serta agensinya telah mengatur pelbagai jenis program latihan, akses pasaran, pembangunan kapasiti dan pembiayaan seperti berikut:

- (i) Sebanyak RM213.7 juta telah diperuntukkan bagi pelaksanaan 6 program khusus bagi usahawan wanita oleh INSKEN, PERNAS, UDA Holdings Bhd, SME Bank, TEKUN dan SME Corp; dan
- (ii) Sebanyak RM127.5 juta telah diperuntukan bagi pelaksanaan 11 program usahawan belia oleh Protégé, SME Corp, IKM, PERNAS, TEKUN, UDA Holdings Bhd dan SME Bank.

Justeru, Kementerian ingin menyeru agar usahawan belia dan wanita untuk lebih cakna mengenai program-program yang disediakan di bawah MEDAC dan mengambil peluang yang telah disediakan oleh pihak Kerajaan untuk terus maju dan meningkat dalam bidang keusahawanan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : YB PUAN WONG SHU QI (KLUANG)

TARIKH : 8 MAC 2022 (SELASA)

SOALAN

PUAN WONG SHU QI (KLUANG) minta **MENTERI PERUMAHAN DAN KERAJAAN TEMPATAN** menyatakan jumlah sisa tambahan mengikuti pandemik COVID-19 seperti pelitup muka pakai buang, pakej kit ujian, PPE dan sebagainya serta rancangan untuk mengurangkan sisa tersebut melalui kolaborasi bersama Kementerian berkenaan.

JAWAPAN

Tuan Yang di-Pertua,

Untuk makluman Ahli Yang Berhormat, situasi pandemik COVID-19 telah menyebabkan berlakunya peningkatan mendadak sisa pelitup muka, kit ujian kendiri dan PPE yang menyebabkan satu kaedah pelupusan yang selamat perlu diwujudkan dalam menjaga kelestarian alam sekitar di negara ini.

Berdasarkan maklumat daripada Perbadanan Pengurusan Sisa Pepejal dan Pembersihan Awam (SWCorp), dianggarkan sebanyak 86.66 tan/hari sisa pelitup muka dijana oleh penduduk Malaysia pada tahun 2020 (dengan anggaran penggunaan 1 helai pelitup muka sehari dengan berat pelitup muka 3gram/helai). Sisa buangan ini hendaklah diuruskan mengikut prosedur yang disarankan oleh Kementerian Kesihatan Malaysia (KKM) memandangkan sisa pelitup muka bukan perubatan (*non-medical mask*), kit ujian kendiri COVID-19 dan PPE yang dipakai oleh orang awam dikategorikan sebagai sisa domestik dan bukan sisa klinikal.

Kementerian ini akan terus bekerjasama dengan Kementerian Kesihatan Malaysia, Jabatan Alam Sekitar dan agensi-agensi Kerajaan berkaitan yang lain bagi meningkatkan kesedaran dan tanggungjawab Keluarga Malaysia dalam menguruskan sisa-sisa tersebut melalui pemerkasaan program-program pendidikan masyarakat yang telah dirancang di bawah Agenda Nasional Malaysia Sihat (ANMS).

Sekian, terima kasih.

SOALAN NO : 30

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN SIVAKUMAR VARATHARAJU
NAIDU (BATU GAJAH)**

TARIKH : 8 MAC 2022 (SELASA)

SOALAN

TUAN SIVAKUMAR VARATHARAJU NAIDU (BATU GAJAH) minta **MENTERI PERPADUAN NEGARA** menyatakan bagaimanakah RM100 juta yang diperuntukkan kepada MITRA dalam Belanjawan 2022 akan dibelanjakan pada tahun ini. Apakah program-program pembangunan sosioekonomi kaum India yang telah dirangka dan berapa jumlah wang akan digunakan untuk membayar ‘hutang’ terdahulu daripada peruntukan RM 100 juta itu.

JAWAPAN

Tuan Yang Di-Pertua,

1. Pada tahun 2021, Kementerian Perpaduan Negara dengan kerjasama Universiti Sains Malaysia juga telah membangunkan **Pelan Tindakan Masyarakat India (PTMI)** sebagai panduan pelaksanaan program bagi meningkatkan taraf sosioekonomi masyarakat India B40.
2. **Pelaksanaan program bagi tahun 2022 untuk meningkatkan taraf sosioekonomi masyarakat India B40 adalah berdasarkan lima (5) Tunjang utama PTMI seperti berikut:**
 - i. **Tunjang 1: Memperkasakan Keperluan Asas**
 - ii. **Tunjang 2: Meningkatkan Kemenjadian Setiap Kanak-kanak**
 - iii. **Tunjang 3: Menaik taraf Ekonomi & Keusahawanan**
 - iv. **Tunjang 4: Memperkasakan Keterangkuman Sosial**
 - v. **Tunjang 5: Memperkasakan Wanita Ke Arah Kesaksamaan Gender**
3. Terdapat program tahun 2021 yang masih dalam pelaksanaan dan dijangka siap sepenuhnya pada tahun 2022. Oleh yang demikian, baki anggaran bayaran yang akan dilakukan menggunakan peruntukan tahun 2022 adalah sebanyak RM300,000.00.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN CHA KEE CHIN [RASAH]

TARIKH : 08 MAC 2022 (SELASA)

SOALAN

TUAN CHA KEE CHIN [RASAH] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah langkah-langkah yang telah dan akan diambil oleh Kementerian ini atau Kementerian lain yang berkaitan, untuk mengatasi masalah kenaikan harga barang keperluan di pasaran runcit, seperti sayur-sayuran, telur, ayam, minyak masak dan roti, kenaikan harga telah membebankan kehidupan rakyat khasnya golongan B40 dan M40.

JAWAPAN

Yang di-Pertua,

Kementerian sentiasa memantau isu kenaikan harga mendadak yang berlaku melalui pemantauan dan pemeriksaan secara langsung ke atas premis yang mengalami isu tersebut. Antara langkah-langkah yang diambil oleh Kementerian bagi mengawal kenaikan harga barang adalah seperti berikut:-

- i. Mengadakan Skim Harga Maksimum Musim Perayaan (SHMMP) dan Skim Harga Maksimum Keluarga Malaysia (SHMKM) bagi menetapkan harga maksimum untuk barang tertentu pada tempoh tertentu; (SHMMP Tahun Baru Cina 2022 berlangsung dari 29 Januari 2022 hingga 4 Februari 2022 telah melibatkan 8,150 pemeriksaan premis di seluruh negara. Manakala SHMKM dilaksanakan pada 1 Januari 2022 hingga 4 Februari 2022 yang melibatkan 43,348 jumlah pemeriksaan premis)
- ii. Melaksanakan Penentuan Harga Maksimum bagi Ayam dan Telur Ayam sehingga 5 Jun 2022 ini bagi memberikan kestabilan harga kepada kedua-dua item tersebut; dan
- iii. Bekerjasama dengan kementerian lain terutama sekali MAFI dalam memastikan pengeluaran makanan dan barang keperluan lain dijamin bekalan dan stabil harganya. Libat urus berterusan dengan industri, pengeluar, pengimport, pemborong, peruncit, persatuan pengguna dan lain-lain pihak berkaitan, tetap dijalankan dari masa ke semasa tanpa gagal.

Mana-mana peniaga yang didapati menaikkan harga barang secara melampau, notis bertulis akan dikeluarkan kepada peniaga dan sekiranya selepas dianalisa didapati mencatut, kesalahan dibawah Sek. 14 AKHAP boleh diambil ke atas mereka. Kementerian telah dan sedang melaksanakan pelbagai Ops seperti Ops Catut, Ops Pasar, Ops Cakna, Ops Rantai dan lain-lain ops bagi mengawal bekalan dan harga barang keperluan asas pengguna.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : LISAN

**DARIPADA : YB TUAN RAMLI BIN MOHD NOR
(CAMERON HIGHLANDS)**

TARIKH : 8 MAC 2022 (SELASA)

SOALAN

DATO' RAMLI BIN DATO' MOHD NOR (CAMERON HIGHLANDS) minta **MENTERI DALAM NEGERI** menyatakan apakah langkah yang dilakukan oleh Kerajaan untuk menyelesaikan masalah pendaftaran perkahwinan bagi masyarakat Orang Asli di negara ini.

JAWAPAN

Tuan Yang Di Pertua,

Kementerian Dalam Negeri (KDN) melalui Jabatan Pendaftaran Negara (JPN) mendaftarkan perkahwinan dan perceraian bagi pasangan bukan beragama Islam selaras dengan peruntukan di bawah Akta Membaharui Undang-Undang (Perkahwinan dan Perceraian) 1976 [Akta 164]. Akta ini tidak terpakai bagi seseorang anak Negeri (*native*) Sabah, Sarawak atau seseorang Orang Asli Semenanjung Malaysia yang perkahwinan dan perceraianya tertakluk kepada undang-undang adat anak negeri atau adat Orang Asli **melainkan jika mereka memilih untuk berkahwin di bawah Akta ini.**

Bagi seseorang Orang Asli Semenanjung Malaysia yang memilih untuk berkahwin di bawah Akta 164 ini mereka **adalah terikat dan perlu**

mematuhi syarat-syarat yang telah ditetapkan di bawah Akta ini. Di antara syarat-syarat yang ditetapkan adalah :-

- a) Perkahwinan adalah monogami;
- b) Had umur kahwin mestilah berumur genap 18 tahun ke atas. Walau bagaimanapun, bagi perempuan yang berumur genap 16 tahun tetapi belum mencapai 18 tahun, memerlukan satu lesen yang dikeluarkan oleh Ketua Menteri;
- c) Jika salah seorang tidak bersetuju untuk bercerai, pasangan perlu menghadiri sesi tribunal perkahwinan di JPN dan perlu diselesaikan dalam tempoh 6 bulan; dan
- d) Prosiding perceraian perlu diselesaikan di Mahkamah Tinggi Malaysia. Pasangan perlu melantik seorang peguam bagi membawa kes ke mahkamah. Kos peguam adalah ditanggung oleh pasangan.

Bagi Orang Asli, pendaftaran perkahwinan di bawah adat resam Orang Asli adalah sah dan tidak perlu mendaftar semula perkahwinan tersebut di bawah Akta 164.

Berdasarkan Seksyen 4 Akta Orang Asli 1954 (Akta 134) menyatakan Ketua Pengarah Orang Asli hendaklah bertanggungjawab bagi pentadbiran, kebijakan dan kemajuan am Orang Asli :

Dengan syarat tiada apa-apa juga dalam seksyen ini boleh disifatkan sebagai menghalang ketua-ketua Orang Asli daripada menjalankan kuasanya dan perkara adat dan kepercayaan Orang Asli dalam mana-mana masyarakat Orang Asli atau mana-mana kumpulan atau etnik Orang Asli.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI AZALINA OTHMAN SAID
(PENGERANG)**

TARIKH : 8 MAC 2022 (SELASA)

SOALAN

DATO' SRI AZALINA OTHMAN SAID (PENGERANG) minta MENTERI PERUMAHAN DAN KERAJAAN TEMPATAN menyatakan apakah usaha-usaha yang dilakukan oleh Kementerian untuk menyokong penaiktarafan (daerah kecil Pengerang) Parlimen Pengerang ke status daerah penuh.

JAWAPAN

Tuan Yang di-Pertua,

Kementerian Perumahan dan Kerajaan Tempatan (KPKT) sentiasa menyokong pembangunan infrastruktur, sosial dan perancangan di semua kawasan Pihak Berkuasa Tempatan (PBT) termasuk kawasan Parlimen Pengerang. Usaha-usaha yang telah dilakukan di kawasan Parlimen Pengerang antaranya adalah seperti berikut:

- (a) pembangunan Program Perumahan Rakyat (PPR) Kechil Pengerang untuk menyediakan 300 unit rumah yang kini sedang dalam proses pembinaan;
- (b) pembangunan Program Perumahan Transit Penjawat Awam Pengerang untuk menyediakan 700 unit rumah yang kini dalam proses perolehan dan dijangka akan dimulakan pembinaannya pada bulan Mac 2022;
- (c) peruntukan pembangunan sebanyak RM1.375 juta bagi tahun 2021 kepada Majlis Perbandaran Pengerang untuk melaksanakan projek-projek berskala kecil bina baharu/ naik taraf yang meliputi pembinaan infrastruktur, kemudahan awam, sosioekonomi dan keselamatan;
- (d) kajian penyediaan Rancangan Tempatan Daerah Kota Tinggi 2020 telah selesai dilaksanakan oleh pihak PLANMalaysia yang melibatkan kawasan Parlimen Kota Tinggi, Pengerang dan Tenggara;
- (e) pelaksanaan Rancangan Kawasan Khas (RKK) bagi kawasan Pengerang yang mana sedang menunggu kelulusan tarikh publisiti daripada Kerajaan Negeri; dan

SOALAN NO : 34

- (f) pelaksanaan Kajian Pelan Tindakan dan Kebolehlaksanaan Bandar Pintar Pengerang 2030 untuk menyediakan satu rancangan pembangunan bandar pintar yang komprehensif bagi merealisasikan hasrat untuk menjadikan Pengerang sebagai bandar pintar dan mampan menjelang 2030.

Seperti mana Ahli Yang Berhormat sedia maklum, berdasarkan Kanun Tanah Negara, sebarang cadangan perubahan persempadanan daerah atau pewujudan daerah baharu adalah di bawah bidang kuasa Pihak Berkuasa Negeri (PBN) masing-masing dan perlu dipersetujui di peringkat Majlis Mesyuarat Kerajaan Negeri (MMKN) untuk diwartakan.

Sehubungan itu, merujuk kepada soalan yang dibangkitkan, Ahli Yang Berhormat boleh menyusuli cadangan bagi pewujudan Daerah Kecil Pengerang ke Daerah Penuh Pengerang dengan pihak Kerajaan Negeri Johor untuk pertimbangan sebelum perkara ini diteliti oleh Kerajaan Persekutuan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SIM CHEE KEONG
[BUKIT MERTAJAM]**

TARIKH : 8 MAC 2022 (SELASA)

SOALAN

TUAN SIM CHEE KEONG [BUKIT MERTAJAM] minta **MENTERI KESIHATAN** menyatakan jumlah vaksin COVID-19 yang telah dilupuskan tanpa digunakan, jenama, sebab dan kos yang terlibat.

JAWAPAN

Tuan Yang di-Pertua,

1. Kementerian Kesihatan Malaysia telah menerima 4 jenis vaksin COVID-19 sejak Program Imunisasi Kebangsaan (PICK) bermula pada bulan Februari 2021. Proses penerimaan dan pengagihan vaksin COVID-19 di bawah PICK telah dipantau secara berterusan bagi memastikan pengendalian dan penggunaan vaksin adalah pada tahap yang optimum.
2. Garis Panduan Pengurusan Produk Vaksin COVID-19 di Fasiliti Kesihatan telah dikeluarkan dan dikemaskini dari semasa ke semasa bagi memastikan pengurusan vaksin dilaksanakan mengikut peruntukan undang-undang, polisi dan garis panduan yang berkuatkuasa. Garis Panduan ini telah menetapkan keperluan agar Pusat Simpanan Vaksin (PSV) dan Pusat Pemberian Vaksin (PPV) melaporkan sebarang insiden melibatkan pengurusan produk yang telah atau berpotensi menjadi

SOALAN NO : 35

pembaziran atau sebaliknya

3. KKM sentiasa memantau dan menyemak secara terperinci jumlah kerugian disebabkan bekalan vaksin yang rosak serta puncanya. Antara punca pembaziran vaksin COVID-19 di PPV dan PSV adalah disebabkan oleh penyimpangan suhu yang berlaku yang mana aspek kualiti, keselamatan dan keberkesanannya vaksin COVID-19 telah terjejas.

4. Maklumat dan data kerugian perlu diteliti secara terperinci untuk memastikan ia adalah betul dan tepat sebelum dimaklumkan kepada umum. Pada masa ini, KKM sedang menjalankan proses kompilasi serta verifikasi maklumat pelupusan vaksin, dan proses ini dilaksanakan secara berterusan sehingga PICK selesai.

Sekian, terima kasih.

SOALAN NO : 36

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : LISAN

**DARIPADA : YB TUAN LUKANISMAN BIN AWANG SAUNI
(SIBUTI)**

TARIKH : 8 MAC 2022 (SELASA)

SOALAN

TUAN LUKANISMAN BIN AWANG SAUNI (SIBUTI) minta **MENTERI DALAM NEGERI** menyatakan adakah Kerajaan akan mempertimbangkan Balai Polis Batu Niah dinaik taraf bangunan dan status kepada Balai Polis Daerah Subis dan apakah langkah untuk memohon gantian penuh balai polis dan kuarters daif di Bekenu dan Batu Niah.

JAWAPAN

Tuan Yang Di-Pertua,

Parlimen Sibuti mempunyai dua (2) buah balai polis iaitu Balai Polis Bekenu dan Balai Polis Batu Niah yang terletak di bawah pentadbiran Ibu Pejabat Polis Daerah (IPD) Miri.

Balai Polis Bekenu yang berada dalam pentadbiran daerah Subis mempunyai seramai 21 orang anggota dan diketuai oleh seorang Ketua Polis Balai berpangkat Sarjan. Keluasan pentadbiran Balai Polis Bekenu adalah 84,248 kilometer persegi dengan jumlah penduduk seramai 22,108 orang (Banci 2020). Setakat ini, pentadbiran dan kekuatan keanggotaan IPD Miri yang terletak sekitar 47.6 kilometer dari daerah Subis masih memadai dan mencukupi dalam mentadbir daerah Subis.

Tuan Yang Di-Pertua,

Usaha bagi menaik taraf dan penambahan bilangan kuarters adalah di dalam perhatian dan tindakan pihak Jabatan Logistik dan Teknologi (JLog) PDRM dan ia perlu dilakukan demi keselesaan keselamatan serta kebijakan anggota yang bertugas di kedua-dua balai tersebut.

Kementerian melihat terdapat keperluan bagi kuarters kedua-dua balai tersebut digantikan dengan yang baru memandangkan kuarters tersebut telah usang dan rosak. Bagi Balai Polis Bekenu terdapat tiga (3) blok kuarters namun hanya dua (2) blok sahaja yang dapat didiami dan satu (1) blok lagi mengalami kerosakan yang teruk dan kesemua merupakan kuarters yang dibina menggunakan kayu. Bagi Balai Polis Batu Niah pula, terdapat dua (2) blok kuarters yang dapat didiami dan keduanya merupakan kuarters yang dibina menggunakan kayu.

Cadangan projek ini akan dimasukkan dalam *Rolling Plan* (RP) berikutnya memandangkan terdapat keperluan mendesak untuk dilaksanakan setelah semakan keutamaan dibuat.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : PUAN MARIA CHIN BINTI ABDULLAH [PETALING JAYA]

TARIKH : 8 MAC 2022 (SELASA)

SOALAN

PUAN MARIA CHIN BINTI ABDULLAH [PETALING JAYA] minta **MENTERI KESIHATAN** menyatakan adakah suntikan vaksin penggalak akan menjadi norma baharu dan semua rakyat perlu mengambil suntikan tersebut setiap 6 bulan.

JAWAPAN

Tuan Yang di-Pertua,

1. Pada 24 Februari 2021, Kerajaan telah memulakan Program Imunisasi COVID-19 Kebangsaan (PICK) dengan pemberian vaksin *primary series* kepada individu yang layak dan kemudian diikuti dengan pemberian dos penggalak mulai 13 Oktober 2021.
2. Polisi bagi pemberian vaksin COVID-19 ini sama ada untuk *primary series* mahupun vaksin dos penggalak adalah berdasarkan kepada syor Kumpulan Kerja Teknikal (TWG) bagi pemilihan dan pemberian vaksin dan keputusan Mesyuarat Jawatankuasa Jaminan Akses Vaksin COVID-19 (JKJAV) dan mesyuarat Jawatankuasa Petugas Khas Imunisasi COVID-19 bagi vaksin dos penggalak (CITF-B).
3. Buat masa ini, Kerajaan masih belum membuat keputusan berkaitan pemberian vaksin COVID-19 secara berkala atau berterusan termasuklah ke atas kumpulan yang berisiko tinggi seperti individu rendah imun atau *immunocompromised*. Keputusan ini adalah bergantung kepada syor Kumpulan Kerja Teknikal (TWG) yang membuat penilaian data-data saintifik daripada pelbagai sumber dari dalam dan luar negara atau *real-world data* secara berterusan, termasuk juga mengambil kira syor daripada Pertubuhan Kesihatan Sedunia (WHO) serta agensi kesihatan antarabangsa yang lain.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN SHAHARIZUKIRNAIN BIN ABD. KADIR
[SETIU]**

TARIKH : 8 MAC 2022 (SELASA)

SOALAN

TUAN SHAHARIZUKIRNAIN BIN ABD. KADIR [SETIU] minta **MENTERI KESIHATAN** menyatakan langkah penguatkuasaan larangan merokok di tempat awam bagi mengelakkan lebih ramai masyarakat tergolong dalam kelompok perokok pasif.

JAWAPAN

Tuan Yang di-Pertua,

1. Penguatkuasaan larangan merokok adalah tertakluk di bawah Peraturan- peraturan Kawalan Hasil Tembakau (PPKHT) 2004.
2. Langkah penguatkuasaan larangan merokok di tempat awam yang dijalankan oleh Kementerian Kesihatan adalah seperti berikut:
 - (i) Mewujudkan talian khas aduan merokok melalui aplikasi *Whatsapp* dan talian Hotline Aduan Merokok KKM bagi memudahkan pelaporan daripada orang awam;
 - (ii) Menjalankan operasi penguatkuasaan larangan merokok berserentak dengan penguatkuasaan pematuhan SOP COVID-19;

- (iii) Menurunkan kuasa kepada agensi luar di bawah Seksyen 3 Akta Makanan 1983 seperti Polis Bantuan Sunway dan UiTM Puncak Alam; dan
- (iv) Mengadakan aktiviti-aktiviti kesedaran bagi memperkasakan masyarakat dalam usaha memastikan pematuhan kepada larangan merokok melalui aktiviti-aktiviti di lapangan tertakluk kepada garis panduan pencegahan COVID-19.
3. Menerusi operasi penguatkuasaan yang telah dilaksanakan bagi tahun 2022, sehingga 6 Mac 2022, sebanyak 8,129 notis kesalahan merokok telah dikeluarkan. Pengeluaran notis kesalahan merokok mengikut kesalahan adalah seperti berikut:

Jenis Kesalahan	Jumlah Notis Dikeluarkan
Merokok di kawasan larangan	6,666
Orang belum dewasa merokok	276
Merokok di mana-mana tempat/premis yang diisyiharkan oleh Menteri	262
Gagal mempamerkan tanda larangan merokok di premis/kenderaan/bangunan	280
Menjual rokok di bawah harga minimum	154
Menjual rokok dalam paket yang dibuka	87
Lain-lain kesalahan	404
Jumlah	8,129

4. Selain itu, sebanyak **27,821** notis kesalahan dikeluarkan pada tahun 2020 dan **12,625** notis kesalahan dikeluarkan pada tahun 2021.

SOALAN NO : 38

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

**DARIPADA : TUAN KHALID BIN ABD SAMAD
[SHAH ALAM]**

TARIKH : 08 MAC 2022 (SELASA)

SOALAN

TUAN KHALID BIN ABD SAMAD [SHAH ALAM] minta **MENTERI SUMBER MANUSIA** menyatakan apakah usaha Kerajaan untuk menggalakkan lebih ramai lagi pekerja ekonomi gig seperti pemandu Grab dan FoodPanda untuk berdaftar dan mencarum di bawah Skim SPS I-Lindung.

JAWAPAN

Tuan Yang di-Pertua,

Skim Keselamatan Sosial Pekerjaan Sendiri diwujudkan untuk memberi perlindungan kepada Orang Bekerja Sendiri di bawah peruntukan Akta Keselamatan Sosial Pekerjaan Sendiri 2017 (Akta 789) yang berkuatkuasa mulai 1 Jun 2017.

Strategi dan usaha berterusan sentiasa dilaksanakan oleh Kerajaan untuk menggalakkan lebih ramai lagi pekerja ekonomi gig seperti pemandu Grab dan FoodPanda untuk berdaftar dan mencarum di bawah Skim SPS I-Lindung.

Antara langkah-langkah yang diambil adalah seperti berikut:

- i. melaksanakan koordinasi bersama agensi Kerajaan, persatuan, pertubuhan dan sebagainya di seluruh negara seperti mengadakan sesi libat urus dan aktiviti turun padang. Sebagai contoh, kerjasama dengan Kementerian Pembangunan Usahawan dan Koperasi, Tabung Ekonomi Kumpulan Urus Niaga dan sebagainya.
- ii. wakil daripada Agensi/Persatuan/Pertubuhan telah dilantik sebagai Ejen Keselamatan Sosial Pekerjaan Sendiri mengikut ketetapan di dalam terma dan syarat-syarat bagi maksud pungutan dan penerimaan bayaran caruman. Ejen Keselamatan Sosial Pekerjaan Sendiri juga bertanggungjawab melaksanakan aktiviti promosi, publisiti dan pemudah cara bagi tuntutan faedah Skim Keselamatan Sosial Pekerjaan Sendiri.
- iii. bagi meningkatkan kesedaran mencarum dengan Skim Keselamatan Sosial Pekerjaan Sendiri, hebahan dan promosi di kalangan Orang Bekerja Sendiri turut dipergiatkan. Inisiatif promosi yang dilaksanakan merentasi pelbagai platform termasuklah media cetak dan elektronik, laman web, media sosial dan platform digital.
- iv. memanfaatkan saluran berita, usaha menguar-uarkan bantuan faedah juga dibuat melalui pelbagai program majalah dan dokumentari, temubual dan wawancara, perkongsian kisah penerima faedah, infografik dan sebagainya.

Usaha ini akan terus dilaksanakan bagi memastikan caruman Skim Keselamatan Sosial Pekerjaan Sendiri dipertingkatkan dan seterusnya melindungi Orang Bekerja Sendiri.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATO' DR. MOHD KHAIRUDDIN BIN AMAN
RAZALI [KUALA NERUS]**

TARIKH : 08 MAC 2022 (SELASA)

SOALAN

DATO' DR. MOHD KHAIRUDDIN BIN AMAN RAZALI [KUALA NERUS] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan mekanisme Kementerian untuk mengawal harga bekalan makanan tertentu yang dijangka mengalami kenaikan sehingga 10 peratus menjelang Ramadan dan Aidilfitri ini.

JAWAPAN

Yang di-Pertua,

Kementerian mengadakan Skim Harga Maksimum Musim Perayaan Hari Raya Puasa sebagai mekanisme yang diambil bagi menetapkan harga maksimum untuk barang tertentu pada tempoh tertentu. Skim Harga Maksimum Musim Perayaan (SHMMP) yang sebelum ini dikenali dengan Skim Kawalan Harga Musim Perayaan (SKHMP) adalah suatu skim yang dilaksanakan dengan objektif untuk menyekat kenaikan harga yang tidak berpatutan dan mencegah amalan mencatut atau mengambil untung secara berlebihan (*profiteering*) di kalangan peniaga semasa musim perayaan. Para peniaga diwajibkan menjual barang harga terkawal tidak melebihi harga maksimum yang ditentukan oleh Kerajaan sepanjang tempoh skim berkuat kuasa. SHMMP Hari Raya Puasa telah bermula sejak tahun 2000. Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : LISAN

**DARIPADA : YB PUAN HANNAH YEOH TSEOW SUAN
(SEGAMBUT)**

TARIKH : 8 MAC 2022 (SELASA)

SOALAN

PUAN HANNAH YEOH TSEOW SUAN (SEGAMBUT) minta **MENTERI DALAM NEGERI** menyatakan butiran parti politik yang telah diberikan kelulusan penubuhan, permohonan yang telah ditolak (termasuk alasan penolakan) dan permohonan yang masih tertunggak sejak Februari 2020 sehingga sekarang.

JAWAPAN

Tuan Yang Di Pertua,

Sehingga 31 Januari 2022, jumlah pertubuhan parti politik yang telah didaftarkan di bawah Akta Pertubuhan 1966 (Akta 832) oleh Jabatan Pendaftaran Pertubuhan Malaysia (JPPM), Kementerian Dalam Negeri (KDN) adalah sebanyak **67 pertubuhan parti induk** dan **86,786 pertubuhan cawangan parti politik**. Manakala, jumlah permohonan pendaftaran parti politik yang ditolak oleh JPPM dari tahun 2018 adalah sebanyak **86 permohonan**.

Dalam tempoh Februari 2020 sehingga kini, terdapat sebanyak **25 permohonan** pendaftaran parti politik telah diterima dan status permohonan tersebut sedang dalam proses semakan dan penelitian pihak JPPM untuk pertimbangan selanjutnya.

Secara dasarnya, keputusan penolakan sesuatu permohonan pertubuhan untuk didaftarkan sebagai sebuah parti politik adalah diproses mengikut peruntukan undang-undang yang termaktub di dalam Akta Pertubuhan 1966 (Akta 832) dan Peraturan-Peraturan Pertubuhan 1984 yang berkuatkuasa. Dalam hal ini, pendaftaran dan penolakan ke atas pertubuhan yang dikeluarkan oleh JPPM adalah berdasarkan proses semakan dan penelitian di bawah Seksyen 7 Akta Pertubuhan 1966.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FADHLI BIN SHAARI
[PASIR MAS]**

TARIKH : 8 MAC 2022 (SELASA)

SOALAN

TUAN AHMAD FADHLI BIN SHAARI [PASIR MAS] minta **MENTERI KESIHATAN** menyatakan statistik aduan rakyat berhubung kesan negatif terhadap kesihatan selepas menerima suntikan vaksin terutama suntikan dos penggalak dan apa langkah selanjutnya yang akan diambil oleh Kementerian untuk mengawal keadaan ini.

JAWAPAN

Tuan Yang di-Pertua,

1. Sejak Program Imunisasi COVID-19 Kebangsaan dimulakan pada bulan Februari 2021 sehingga 25 Februari 2022, Bahagian Regulatori Farmasi Negara (NPRA) telah menerima sejumlah 25,445 laporan Kesan Advers Susulan Imunisasi (AEFI). Pelaporan AEFI di kalangan penerima dos penggalak direkodkan berjumlah 1,275 bersamaan kadar 89 laporan bagi setiap sejuta dos. Ini adalah lebih rendah daripada kadar keseluruhan pelaporan AEFI (381 bagi setiap sejuta dos).
2. Untuk makluman, NPRA menerima semua jenis laporan AEFI yang disyaki atau berkemungkinan disebabkan vaksin. Statistik yang dinyatakan ini adalah berdasarkan jumlah laporan AEFI yang diterima yang mana hubungkait kesan advers dengan vaksin masih perlu melalui proses pengesahan dan pembuktian klinikal. Daripada jumlah laporan

AEFI yang diterima bagi dos penggalak ini, hanya 90 laporan (atau 7.06% daripada jumlah laporan AEFI diterima bagi dos penggalak) diklasifikasikan sebagai serius bersamaan kadar 6.3 laporan bagi setiap juta dos.

3. NPRA telah menerima 45 laporan AEFI melibatkan kematian di kalangan penerima vaksin dos penggalak yang memerlukan penyiasatan dan penilaian. Jawatankuasa Farmakovigilans Khas Vaksin COVID-19 (JFK) telah menjalankan penilaian ke atas 22 laporan yang telah lengkap penyiasatan dan didapati **kematian yang dilaporkan tersebut tiada hubung kait dengan vaksin yang diterima**. Terdapat 23 laporan lagi masih dalam proses penyiasatan sebelum boleh dibentangkan untuk penilaian oleh JFK. Data pelaporan yang diterima oleh NPRA secara keseluruhannya termasuk bagi dos penggalak menunjukkan trend yang konsisten seperti yang dilaporkan oleh agensi regulatori di negara-negara lain.
4. Setakat ini, trend pelaporan AEFI termasuk kesan-kesan yang dilaporkan bagi dos penggalak adalah setara dengan pelaporan yang diterima bagi dos primer, namun dengan kadar pelaporan yang lebih rendah. Walau bagaimanapun, terdapat kes-kes AEFI yang ditularkan di media sosial telah memberi gambaran kurang tepat berkenaan dos penggalak. Siasatan ke atas beberapa kes tersebut mendapati kebanyakan dakwaan yang dibuat adalah tidak berasas dan kes-kes berkenaan bukan disebabkan oleh kesan vaksin yang diambil.
5. Berdasarkan analisis interim bagi data Kajian Surveilans Keselamatan Vaksin COVID-19) (NMRR- 21-555-59135 (IIR)) yang dijalankan oleh NPRA untuk tempoh Februari hingga November 2021, majoriti AEFI yang dilaporkan adalah ringan dan biasanya akan pulih dalam tempoh masa beberapa hari tanpa rawatan. Trend ini adalah setara dengan pelaporan yang diterima bagi dos primer tetapi dengan kadar pelaporan yang lebih rendah. Kajian ini juga mendapati bahawa bilangan laporan kes AEFI serius yang diterima susulan pengambilan dos penggalak adalah 43.7% lebih rendah berbanding susulan pemberian dos primer.

SOALAN NO : 42

6. KKM akan terus memantau keselamatan vaksin di peringkat global dan sentiasa telus dalam melaporkan sebarang isu berkaitan keselamatan vaksin kepada masyarakat umum. Penerima vaksin yang mengalami kesan AEFI layak memohon Bantuan Khas Kewangan (BKK) yang mana pampasan akan dibayar sekiranya kesan AEFI mempunyai hubung kait dengan vaksin yang diterima.
7. Selain itu, pesakit turut diberikan rawatan berdasarkan simptom dan diagnosis pesakit dan pemantauan dan rawatan susulan juga turut diberikan. KKM telah menghasilkan "*Ministry of Health Clinical Guidelines On COVID-19 Vaccination In Malaysia*" bagi memberi informasi klinikal terkini berkenaan vaksin, kontraindikasi vaksin, kesan sampingan dan aspek-aspek klinikal yang perlu diambil kira dalam pemberian vaksin serta rawatan kecemasan jika insiden seperti anafilaksi berlaku kepada penerima vaksin.
8. Berdasarkan pemantauan NPRA, nisbah manfaat manfaat dan risiko (*benefit-risk ratio*) vaksin-vaksin ini adalah positif. Oleh itu, KKM akan terus menggunakan pelbagai saluran media untuk memberi keyakinan kepada rakyat mengenai manfaat vaksin. Ini termasuk pemakluman di laman sesawang NPRA, Program Perkhidmatan Farmasi, KKM, Jawatankuasa Khas Jaminan Akses Bekalan Vaksin COVID-19 (JKJAV) dan di media-media sosial. Maklumat juga dihebahkan oleh pegawai-pegawai KKM dan NPRA kepada orang ramai melalui undangan bual bicara, seminar dan temu ramah di televisyen, radio dan laman sosial dari semasa ke semasa. Selain itu, maklumat turut disampaikan kepada pemberi vaksin iaitu kakitangan kesihatan kerajaan dan swasta semasa sesi-sesi latihan yang dijalankan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN JUGAH ANAK MUYANG @ TAMBAT
(LUBOK ANTU)**

TARIKH : 8 MAC 2022 (SELASA)

SOALAN

**TUAN JUGAH ANAK MUYANG @ TAMBAT (LUBOK ANTU) minta
MENTERI PERUMAHAN DAN KERAJAAN TEMPATAN menyatakan
apakah status balai bomba yang telah diluluskan dan bilakah projek ini
akan dilaksanakan.**

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) melalui Jabatan Bomba dan Penyelamat Malaysia (JBPM) sentiasa berusaha untuk memastikan khidmat kebombaan terus diperkasa dan diperluas kepada seluruh masyarakat terutamanya melibatkan kawasan di luar capaian *response time*.

Kementerian melalui JBPM telah mengenal pasti tapak yang sesuai dan telah membuat permohonan tanah seluas 1.77 hektar kepada Jabatan Tanah dan Survei Sarawak bagi tujuan pembinaan balai bomba kategori E di kawasan Lubok Antu. Walau bagaimanapun, sehingga kini JBPM masih belum mendapat sebarang kelulusan pemilikan tapak tanah tersebut daripada kerajaan negeri. Setelah proses bagi mendapatkan hak milik tapak tanah ini selesai, Kementerian melalui JBPM bercadang untuk membuat permohonan pembinaan balai bomba di kawasan Lubok Antu di bawah Rancangan Malaysia Kedua Belas (RMKe-12), *Rolling Plan 3* (RP3), Tahun 2023.

Pada masa kini, kawasan Lubok Antu mendapat perkhidmatan perlindungan kebakaran daripada Pasukan Bomba Sukarela (PBS) Lubok Antu dengan kekuatan keanggotaan seramai 41 orang ahli yang dilengkapi dengan sebuah pacuan empat roda, peralatan pemadam dan peralatan perlindungan diri (PPE) yang juga disediakan oleh JBPM Negeri Sarawak.

Bagi mempertingkatkan aspek keselamatan kebakaran di kawasan Lubok Antu, Kementerian melalui JBPM telah merancang dan melaksanakan beberapa program seperti berikut:

- (i) pengwujudan **Program Community Emergency Response Team (CERT)** melalui inisiatif Kerajaan Negeri Sarawak yang bertujuan untuk melatih masyarakat tempatan di suatu lokaliti sebagai Pasukan Bertindak Awal (*First Responder*);
- (ii) memperluaskan penubuhan **Bomba Komuniti** di mana kefahaman tentang pencegahan kebakaran, latihan kebombaan dan penyediaan peralatan asas kawalan awal kebakaran seperti alat pemadam api disedia serta dibekalkan;
- (iii) mempertingkatkan kempen kesedaran keselamatan kebakaran termasuk Program 1 Rumah 1 Alat Pemadam Api (**1RAPI**), Program Sedia Urus Isi Rumah (**SURI**) dan penyediaan alat pengesan asap serta gas (**MyAlert**); dan
- (iv) mempergiatkan **program latihan dan pencegahan** di kawasan-kawasan luar bandar/ pedalaman (*Outreach and Summer Camp*).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

**DARIPADA : YB DATO' SRI RICHARD RIOT ANAK JAEM
[SERIAN]**

TARIKH : 08 MAC 2022 (SELASA)

SOALAN

DATO' SRI RICHARD RIOT ANAK JAEM [SERIAN] minta **MENTERI SUMBER MANUSIA** menyatakan apakah status terkini projek Pembinaan Institut Latihan Perindustrian (ILP) Serian.

JAWAPAN

Tuan Yang di-Pertua,

Projek Penubuhan Institut Latihan Perindustrian Serian, Sarawak telah bermula pada 26 April 2018 dan dijadualkan siap pada 28 Ogos 2022. Institut ini dibangunkan di atas tanah seluas 56.76 ekar di Bukar Sadong Land District, Kampung Tenggak, Serian, Sarawak dan dapat menampung kapasiti seramai 600 orang pelajar pada satu-satu masa bagi mengikuti kursus yang ditawarkan kelak.

Status kemajuan bagi projek ini bagi tempoh sehingga Januari 2022 adalah 56.42% berbanding jadual 81.81% melibatkan kelewatan sebanyak 25.39%. Kelewatan yang berlaku adalah disebabkan kesan daripada Perintah Kawalan Pergerakan yang diumumkan oleh Kerajaan di samping Arahan Penutupan tapak bina disebabkan kes jangkitan Covid-19. Selain itu terdapat Arahan Perubahan Kerja yang dikeluarkan kepada pihak kontraktor berikutan pertukaran skop kerja juga menyumbang kepada kelewatan projek.

Pihak Kementerian telah menerima permohonan lanjutan masa daripada Kontraktor dan sedang mempertimbangkan permohonan tersebut.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : JAWAB LISAN

DARIPADA : PUAN VIVIAN WONG SHIR YEE [SANDAKAN]

TARIKH : 8 MAC 2022 (SELASA)

SOALAN

PUAN VIVIAN WONG SHIR YEE [SANDAKAN] minta **MENTERI SUMBER MANUSIA** menyatakan apakah rancangan Kerajaan dalam membantu industri intensif buruh seperti sektor pembinaan dan perladangan untuk mengguna pakai tahap mekanisme yang lebih tinggi dan mengurangkan kebergantungan kepada buruh asing yang murah.

JAWAPAN

Tuan Yang Di-Pertua,

Kerajaan sedia maklum peralihan ekonomi negara dan sektor industri ke arah revolusi perindustrian 4.0 dan pendigitalan dalam usaha memastikan negara kekal berdaya saing di peringkat antarabangsa. Kerajaan juga menyahut usaha-usaha sektor industri bagi menerapkan IR4.0 dan pendigitalan di dalam sistem pengeluaran dan pembuatan bagi membantu meningkatkan kadar produktiviti dan kecekapan masing-masing.

Dalam hal tersebut, Kerajaan berusaha membantu industri intensif buruh seperti sektor pembinaan dan perladangan untuk mengguna pakai tahap mekanisme yang lebih tinggi seperti berikut:

- i. menggalakkan majikan untuk memfokuskan proses pengeluaran menggunakan peralatan atau teknologi yang

SOALAN NO : 45

memerlukan pekerja untuk menggerakkannya (atau *labour-using technologies*) berbanding menggunakan teknologi yang menggantikan atau melengkapi pekerja (atau *capital-using technologies*)

- ii. memberi penekanan agar fokus diberikan bagi mengoptimumkan adaptasi dari industri yang *labour-intensive* kepada automasi dan teknologi. Antara beberapa *exit strategy* yang dilaksanakan oleh agensi kawal selia adalah:
 - (i) Dasar 4IR atau Industry4WRD di bawah Kementerian Perdagangan Antarabangsa dan Industri. Dasar peringkat nasional ini menyasarkan bagi mentransformasi industri pembuatan dan perkhidmatan berkaitan kepada automasi dan 4IR menjelang tahun 2025;
 - (ii) Automation Capital Allowance oleh MIDA. Menerusi insentif ini, industri yang layak boleh menerima sehingga 200 peratus pelepasan ke atas sejumlah perbelanjaan yang digunakan bagi menerapkan dan menggunakan teknologi automasi dalam proses pengeluaran;
 - (iii) Soft Loan Scheme for Automation and Modernisation oleh Malaysian Industrial Development Finance Berhad (MIDF). Syarikat yang layak boleh memohon pembiayaan sehingga RM20 juta bagi menaik taraf dan mengautomasikan sistem pengeluaran dan pembuatan masing-masing; dan
 - (iv) Formation of Mechanisation and Automation Research Consortium for Oil Palm (MARCOP) di bawah MPIC. Menerusi inisiatif ini, MARCOP akan merangka dan melaksanakan langkah-langkah bagi memudahkan industri perladangan khususnya ladang sawit bagi beralih kepada *mechanisation* dan *automation*.

Berdasarkan maklumat yang diperolehi, penggajian pekerja asing oleh industri adalah bagi menangani permintaan industri bagi mengatasi kekurangan tenaga kerja di dalam sektor berkemahiran rendah dan intensif buruh. Sejak tahun 2011, sektor pembuatan merekodkan bilangan pekerja asing yang tertinggi berbanding sektor intensif buruh yang lain. Walaupun begitu, sektor perladangan, pembinaan dan perkhidmatan turut menyaksikan peningkatan kebergantungan yang tinggi ke atas pekerja asing.

Oleh itu, berdasarkan input yang diperolehi dari pihak yang berkaitan, Kerajaan meneliti strategi jangka masa sederhana dan jangka masa panjang yang boleh digunakan bagi mengurangkan kebergantungan negara ke atas pekerja asing. Kementerian ini mengesyorkan supaya setiap Agensi Kawal Selia setiap sektor perlu bertanggungjawab dan merangka *exit strategy* bagi mengurangkan kebergantungan ke atas pekerja asing di bawah sektor masing-masing.

Kerajaan turut prihatin bahawa kebarangkalian terdapat pekerja tempatan yang akan turut terjejas dengan peralihan majikan masing-masing ke arah automasi dan IR4.0.

Oleh itu, Kerajaan telah menyediakan latihan kemahiran semula dan peningkatan kemahiran (*reskilling and upskilling*) menerusi agensi-agensi di bawah Kementerian ini seperti Pembangunan Sumber Manusia Berhad bagi melengkapkan pekerja tempatan dengan kemahiran baharu yang diperlukan bagi memastikan mereka kekal relevan dan mampu untuk terus bekerja bagi menampung kehidupan masing-masing.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN LARRY SOON @ LARRY SNG WEI SHIEN (JULAU)

TARIKH : 8 MAC 2022 (SELASA)

SOALAN

TUAN LARRY SOON @ LARRY SNG WEI SHIEN (JULAU) minta MENTERI PERUMAHAN DAN KERAJAAN TEMPATAN menyatakan apakah tindakan Kementerian bagi membantu negeri Sarawak yang kekurangan balai bomba di beberapa lokaliti kawasan tertentu dan adakah disediakan dana oleh pihak Kementerian berhubung permohonan untuk penambahan pembinaan balai bomba baharu.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) sentiasa komited dalam memperluaskan capaian perkhidmatan kebombaan bagi memastikan aspek keselamatan dan kesejahteraan rakyat di negeri Sarawak terus terjamin. Pada masa kini, terdapat sebanyak 36 buah balai bomba merangkumi pelbagai kategori yang sedang beroperasi di seluruh negeri Sarawak. Selain itu, terdapat dua (2) projek balai bomba kategori D yang kini dalam fasa pembinaan iaitu Balai Bomba dan Kuarters Lutong dan Balai Bomba dan Kuarters Asajaya.

Kementerian melalui Jabatan Bomba dan Penyelamat Malaysia (JBPM) menyedari bahawa masih terdapat *blind spot* kawasan-kawasan di Sarawak yang memerlukan penyediaan balai bomba. Namun, jika dilihat dari aspek keberkesanan kos kewangan (*cost effectiveness*), beberapa kaedah sedang dan akan dilaksanakan oleh Kementerian bersama JBPM bagi memastikan perkhidmatan kebombaan dapat diperluas termasuklah di kawasan Julau, Sarawak.

Salah satu kaedah bagi menangani isu kekurangan balai bomba di Sarawak adalah dengan memperkasakan penglibatan masyarakat setempat melalui program-program kesukarelawanan agar mereka mampu bertindak sebagai *first responder* seandainya terjadi sebarang insiden kecemasan atau kebakaran. Pada masa kini, di Sarawak sahaja terdapat sebanyak 56 Pasukan Bomba Sukarela (PBS) yang berdaftar dan aktif dalam menangani kes-kes kebakaran. Bagi memastikan aspek pengurusan PBS ini berada dalam keadaan baik dan tersusun, Kementerian melalui JBPM telah menyalurkan geran bantuan kewangan sebanyak RM168,000.00 pada tahun 2021 untuk diagihkan kepada pasukan PBS tersebut. Penubuhan dan penambahan PBS baharu akan

terus dikaji dari semasa ke semasa dengan berpandukan kajian risiko kebakaran serta permohonan daripada masyarakat setempat.

Selain daripada itu, Kementerian melalui JBPM juga akan terus bekerjasama dengan Kerajaan Negeri Sarawak agar Program *Community Emergency Response Team* (CERT) dapat terus diperluaskan ke lokaliti atau kawasan yang berada di luar capaian perkhidmatan kebombaan. Sehingga kini, sebanyak 16 program telah dilaksanakan di seluruh negeri Sarawak dengan penyertaan seramai 4,500 orang ahli. Program CERT ini mampu melatih masyarakat setempat supaya mahir dalam membantu proses pemadaman awal kebakaran serta tugas-tugas bantuan penyelamatan yang lain.

Untuk makluman Ahli Yang Berhormat juga, aspek pembudayaan amalan keselamatan dalam kalangan komuniti amat dititik beratkan oleh pihak Kementerian. Oleh yang demikian, kempen kesedaran keselamatan kebakaran akan terus dipertingkatkan termasuklah Program 1 Rumah 1 Alat Pemadam Api (1RAPI), Program Sedia Urus Isi Rumah (SURI), penyediaan alat pengesan asap dan gas (MyAlert), program latihan dan pencegahan di kawasan-kawasan luar bandar/ pedalaman (*Outreach and Summer Camp*).

Berhubung dengan isu penyediaan dana yang dibangkitkan, Kementerian selaku penyedia perkhidmatan kebombaan akan terus bekerjasama dengan agensi pusat yang bertanggungjawab dalam mempertimbangkan kelulusan projek pembinaan balai bomba baharu. Pada masa yang sama, KPKT melalui JBPM akan terus melaksanakan kajian risiko kebakaran agar khidmat kebombaan dapat diperluas ke lokaliti-lokaliti tertentu seperti kawasan pedalaman, kawasan rumah panjang, rumah atas air, penempatan tepi sungai dan sebagainya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI DR. SHAMSUL ANUAR BIN HAJI
NASARAH [LENGGONG]**

TARIKH : 08 MAC 2022 (SELASA)

SOALAN

DATUK SERI DR. SHAMSUL ANUAR BIN HAJI NASARAH [LENGGONG] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah usaha yang dilakukan oleh pihak Kementerian bagi mengawal kenaikan kos input bahan mentah ternakan dan pertanian serta apakah faktor kenaikan kos input ini memandangkan ianya mempengaruhi kenaikan harga barang.

JAWAPAN

Yang di-Pertua,

- (a) Kenaikan harga barang banyak dipengaruhi oleh peningkatan kos input barang tersebut. Kos input ini meliputi kos barang dari pengimport dan kos-kos lain yang turut meningkat ekoran kenaikan kadar tukaran matawang asing dan kenaikan harga barang dari pengimport. Kebergantungan Negara kepada bekalan makanan dari luar akan menyebabkan sebarang perubahan harga import memberi kesan kepada harga bahan makanan di dalam Negara.
- (b) Antara langkah-langkah yang diambil oleh Kementerian bagi mengawal kenaikan harga barang adalah seperti berikut:-

- i. Mengadakan Skim Harga Maksimum Musim Perayaan (SHMMP) dan Skim Harga Maksimum Keluarga Malaysia (SHMKM) bagi menetapkan harga maksimum untuk barang tertentu pada tempoh tertentu;

(SHMMP Tahun Baru Cina 2022 berlangsung dari 29 Januari 2022 hingga 4 Februari 2022 telah melibatkan 8,150 pemeriksaan premis di seluruh negara. Manakala SHMKM dilaksanakan pada 1 Januari 2022 hingga 4 Februari 2022 yang melibatkan 43,348 jumlah pemeriksaan premis)
- ii. Melaksanakan Penentuan Harga Maksimum bagi Ayam dan Telur Ayam sehingga 5 Jun 2022 ini bagi memberikan kestabilan harga kepada kedua-dua item tersebut;
- iii. Melaksanakan Program Jualan Keluarga Malaysia (PJKM) iaitu inisiatif kepada rakyat bagi mendapatkan barang keperluan dengan harga yang murah dengan kerjasama dari pasaraya dan peniaga setempat; dan
- iv. Bekerjasama dengan kementerian lain terutama sekali MAFI dalam memastikan pengeluaran makanan dan barang keperluan lain dijamin bekalan dan stabil harganya. Libat urus berterusan dengan industri, pengeluar, pengimport, pemborong, peruncit, persatuan pengguna dan lain-lain pihak berkaitan, tetap dijalankan dari semasa ke semasa tanpa gagal.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN AHMAD FADHLI BIN SHAARI
[PASIR MAS]**

TARIKH : 08 MAC 2022 (SELASA)

SOALAN

TUAN AHMAD FADHLI BIN SHAARI [PASIR MAS] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan langkah Kementerian bagi menangani masalah kekurangan bekalan ayam dan telur yang melanda negara baru-baru ini.

JAWAPAN

Yang di-Pertua,

Kementerian ini telah melakukan pelbagai usaha di bawah kuasa Kementerian ini untuk menangani masalah kekurangan bekalan ayam dan telur ayam di pasaran. Antara langkah yang telah diambil adalah seperti berikut:

- i. Menjalankan pemantauan ke atas 20 syarikat pengeluar ayam pedaging utama yang merangkumi 3 syarikat *integrator* dan 17 syarikat *non-integrator*. Pemantauan ini dilakukan bagi mengesan lebih awal risiko-risiko gangguan bekalan ayam pedaging di peringkat pengeluaran supaya tindakan sewajarnya dapat diambil bagi memastikan bekalan ayam di pasaran sentiasa stabil.

- ii. Membuat unjuran pengeluaran ayam dilakukan setiap bulan bagi membolehkan Kementerian merangka pelan tindakan sewajarnya sekiranya dijangkakan akan berlaku kekurangan bekalan ayam di pasaran.
- iii. Melakukan pemeriksaan harian bagi memantau kedudukan bekalan dan keberadaan ayam dan telur ayam di setiap rantaian pengedaran iaitu di peringkat pengeluar, pemborong dan peruncit.
- iv. Mengeluarkan arahan kepada peruncit untuk memperbaharui stok bekalan yang ada di premis masing-masing dan menghubungi pemborong dan pengeluar jika stok mereka jatuh ke tahap pesanan semula (*re-order limit*).
- v. Mengukuhkan kerjasama dengan agensi-agensi Kerajaan terutama dengan Kementerian Pertanian dan Industri Makanan (MAFI) dalam mengatasi isu bekalan dan harga di peringkat penternakan dan perladangan.
- vi. Mengadakan sesi libat urus bersama pemain industri bagi mengenalpasti punca dan mencari kaedah penyelesaian yang adil dan kondusif bagi memastikan isu kekurangan bekalan telur ayam ketika ini dapat diatasi segera.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : LISAN

DARIPADA : YB TUAN SABRI B. AZIT (JERAI)

TARIKH : 8 MAC 2022 (SELASA)

SOALAN

TUAN SABRI BIN AZIT (JERAI) minta **MENTERI DALAM NEGERI** menyatakan langkah-langkah pihak Kementerian untuk menambah pusat khidmat komuniti di seluruh negara agar menjadi rujukan bekas penagih mendapat bantuan dan khidmat nasihat sementara setelah tamat hukuman.

JAWAPAN

Tuan Yang Di Pertua,

Kementerian Dalam Negeri (KDN) melalui Agensi Antidadah Kebangsaan (AADK) sentiasa menambahbaik perkhidmatan rawatan dan pemulihan yang diberikan kepada klien dalam institusi dan komuniti. Perkhidmatan kepada penagih dadah dan individu yang memerlukan rawatan dan pemulihan dalam komuniti diberikan melalui fasiliti AADK dalam komuniti iaitu di 109 buah AADK Daerah, 29 buah Pusat Khidmat AADK, 49 buah Rumah Komuniti dan 16 buah Pusat Integrasi Klien di seluruh Malaysia. Antara perkhidmatan yang diberikan oleh AADK untuk membantu bekas klien mengekalkan kepulihan adalah melalui program-program berikut:

- i. Psiko-Pendidikan (*Early Recovery / Relapse Prevention*);
- ii. Program Keluarga dan *Significant Others*;
- iii. Psikospiritual dan Kerohanian;
- iv. *Recovery Coach / Mentor-Mentee*;
- v. Sokongan Sosial (Integrasi Masyarakat / Sukan dan Rekreasi);
- vi. Latihan Kemahiran dan Penempatan Kerjaya;
- vii. Bimbingan dan Kaunseling; dan
- viii. Pendidikan Kesihatan.

AADK sentiasa melaksanakan penilaian terhadap keperluan semasa di lapangan untuk menambah baik perkhidmatan yang diberikan termasuk program jagaan lanjutan bagi klien yang telah tamat mengikuti rawatan dan pemulihan di AADK.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KETIGA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN M. KULASEGARAN [IPOH BARAT]

TARIKH : 08 MAC 2022 (SELASA)

SOALAN

TUAN M. KULASEGARAN [IPOH BARAT] minta **MENTERI SUMBER MANUSIA** menyatakan pencapaian Kementerian Sumber Manusia yang telah dicapai dan akan dicapai melalui peruntukan yang diterima melalui Pakej Pemulih 2021 di antaranya Kerajaan telah memperuntukkan RM125 juta melalui Pembangunan Sumber Manusia Berhad (HRD Corp) untuk melaksanakan inisiatif Place and Train bagi 30 ribu orang di bawah program Janapreneur terutamanya kepada belia lepasan sekolah dan graduan.

JAWAPAN

Tuan Yang Di Pertua,

Kerajaan menerusi Pembangunan Sumber Manusia Berhad akan meneruskan pelaksanaan inisiatif yang memberi fokus kepada *Place and Train* dan penjanaan pendapatan melalui pemberian latihan peningkatan kemahiran atau latihan semula kemahiran kepada individu yang perlu dilatih sebelum mereka bekerja bagi menjana pendapatan.

Inisiatif ini dijangka membuka peluang kepada 30,000 orang untuk mengikuti program latihan kemahiran dengan jaminan pekerjaan setelah tamat latihan yang melibatkan RM125 juta peruntukan dan disokong oleh platform HRD Corp Placement Centre serta Jana'Prenuer.

Setakat Februari 2022, Pembangunan Sumber Manusia Berhad telah menerima sebahagian daripada peruntukan ini berjumlah RM10 juta dan seramai 2,000 pelatih telah diluluskan menjurus ke arah penempatan pekerjaan dan penjanaan pendapatan. Pembangunan Sumber Manusia Berhad menjangkakan seramai 28,000 pelatih lagi akan menerima manfaat melalui insiatif ini setelah keseluruhan peruntukan disalurkan kelak.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : DATO' HAJI MOHD FASIAH BIN HAJI MOHD FAKEH [SABAK BERNAM]

TARIKH : 8 MAC 2022 (SELASA)

SOALAN

DATO' HAJI MOHD FASIAH BIN HAJI MOHD FAKEH [SABAK BERNAM] minta **MENTERI KESIHATAN** menyatakan setakat manakah kemajuan dan sambutan Program Imunisasi COVID-19 Kanak-Kanak atau PickKids bagi mereka yang berumur 5 hingga 12 tahun dan nyatakan bilangan kanak-kanak yang telah divaksin serta nyatakan langkah Kementerian bagi memberikan kesedaran di kalangan ibubapa tentang kepentingan vaksin COVID-19 ini bagi keselamatan kesihatan anak-anak mereka.

JAWAPAN

Tuan Yang di-Pertua,

1. PICKids bagi kanak-kanak yang berumur dari 5 hingga 11 tahun telah dimulakan oleh Kerajaan pada 3 Februari 2022. Pada 1 Februari 2022, seramai 517,107 orang kanak-kanak telah berdaftar di aplikasi MySejahtera.
2. Manakala, sehingga 6 Mac 2022, seramai 1,229,084 kanak-kanak telah berdaftar dalam MySejahtera dan ini menunjukkan terdapat peningkatan dalam pendaftaran kanak-kanak yang menggambarkan sambutan baik daripada rakyat di negara ini. Berdasarkan data bertarikh 6 Mac 2022, seramai 1,026,732 (28.9%) kanak-kanak yang layak, telah mendapat dos pertama.

SOALAN NO : 51

3. KKM telah melaksanakan langkah-langkah meningkatkan kesedaran dalam kalangan ibu bapa berkenaan kepentingan vaksin COVID-19 melalui penerangan daripada pakar-pakar dalam bidang masing-masing yang berkaitan dengan vaksin COVID-19.
4. Ini dilakukan melalui saluran media massa dan media sosial antaranya temubual dan wawancara di saluran televisyen dan radio dalam pelbagai bahasa serta taklimat kepada media. Kerjasama daripada agensi-agensi pemegang taruh turut dilibatkan dalam membantu menyampaikan maklumat kepada golongan ibu bapa.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : LISAN

DARIPADA : YB TUAN DR HASAN BAHROM (TAMPIN)

TARIKH : 8 MAC 2022 (SELASA)

SOALAN

DATUK DR. HASAN BIN BAHROM (TAMPIN) minta **MENTERI DALAM NEGERI** menyatakan apakah tindakan atas para mangsa yang enggan berpindah semasa berlakunya bencana, siapakah yang bertanggungjawab sekiranya berlaku kemalangan dan apakah Kerajaan berhasrat merangka satu peraturan bagi mereka yang enggan berpindah sewaktu bencana.

JAWAPAN

Tuan Yang Di Pertua,

Pengurusan bencana negara adalah tertakluk di bawah Arahan No.20 Majlis Keselamatan Negara – Dasar dan Mekanisme Pengurusan Bencana Negara.

Dalam pengurusan bencana, Jemaah Menteri pada 26 Ogos 2015 bersetuju supaya Agensi Pengurusan Bencana Negara (NADMA) ditubuhkan dan mengambil alih tanggungjawab pengurusan bencana daripada Majlis Keselamatan Negara berkuatkuasa 1 Oktober 2015. NADMA adalah Agensi Peneraju Utama Pengurusan Bencana Negara dan bertanggungjawab menyelaras pengurusan bencana negara dan bertanggungjawab untuk membentuk serta memastikan segala dasar dan mekanisme pengurusan bencana negara dipatuhi dan dilaksanakan di setiap peringkat pengurusan bencana. NADMA juga bertanggungjawab untuk mengeluarkan strategi, arahan, pelan tindakan, hala tuju dan dasar dalam pengurusan bencana.

Polis Diraja Malaysia (PDRM), melalui Ketua Polis Daerah, Negeri dan Pengarah Keselamatan Dalam Negeri dan Ketenteraman Awam pula berperanan sebagai Komander Operasi Bencana berdasarkan Tahap Pengurusan Bencana. Tanggungjawab Komender Operasi adalah bagi menyelaras operasi di lapangan termasuk operasi mencari dan menyelamat berdasarkan arahan dan pelan tindakan yang dikeluarkan oleh NADMA.

Dalam hal ini, keputusan untuk merangka dasar atau peraturan baru bagi mewajibkan mangsa banjir untuk berpindah adalah di bawah bidang kuasa NADMA. Cadangan ini boleh diambil kira bagi menambah baik mekanisme pengurusan bencana sedia ada.

SOALAN NO : 52

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : JAWAB LISAN

DARIPADA : YB TUAN WONG CHEN (SUBANG)

TARIKH : 8 MAC 2022 (SELASA)

SOALAN

TUAN WONG CHEN (SUBANG) minta **MENTERI DALAM NEGERI** menyatakan sama ada Unit Siasatan Jenayah Kematian Dalam Tahanan di bawah Jabatan Integriti dan Pematuhan Standard (JIPS) Bukit Aman akan menerbitkan dan melaporkan semua penemuan mengenai kematian dalam tahanan kepada Parlimen.

JAWAPAN

Tuan Yang Di Pertua,

Polis Diraja Malaysia (PDRM) telah mewujudkan Unit Siasatan Jenayah Kematian Dalam Tahanan (USJKT), Jabatan Siasatan/Perundangan/Kajian Kes Bahagian Pematuhan Standard, Jabatan Integriti Pematuhan Standard (JIPS) dan mula menjalankan fungsinya pada 1 Januari 2022 setelah mengambil alih tugas yang sebelum ini digalas oleh Jabatan Siasatan Jenayah (JSJ) PDRM. Unit ini dipertanggungjawabkan dengan tiga (3) kriteria utama penyiasatan iaitu :

- a) *Criminal Liability* – Siasatan telus/pengesanan unsur jenayah/mengenal pasti suspek;
- b) *Duty of Care* – Ketinggalan/kecuaian/kelalaian; dan
- c) *Compliance of SOP* – Pematuhan terhadap SOP dan arahan yang dikeluarkan.

Kes-kes kematian dalam tahanan disiasat terus oleh USJKT, JIPS Bukit Aman dan tidak akan berkompromi terhadap sebarang pelanggaran undang-undang dan salahlaku tatatertib. Pihak PDRM akan membuat sidang media pemakluman kepada pihak pengadu dan keluarga si mati dari semasa ke semasa bergantung kepada siasatan yang telah dijalankan oleh Pegawai Penyiasat.

Pemakluman awal setiap kes turut dimaklumkan kepada pihak Suruhanjaya Hak Asasi Manusia (SUHAKAM) dan Suruhanjaya Integriti Agensi Penguatkuasaan (EAIC) untuk perhatian kedua-dua badan bebas tersebut.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' JOHARI BIN ABDUL
[SUNGAI PETANI]**

TARIKH : 8 MAC 2022 (SELASA)

SOALAN

DATO' JOHARI BIN ABDUL [SUNGAI PETANI] minta **MENTERI KESIHATAN** menyatakan adakah tindakan memberikan vaksin kepada kanak-kanak satu tindakan yang betul dan tepat. Sudah adakah kajian yang mendalam dengan data-data sains yang terkini membuktikan tiada kesan negatif jangka pendek dan jangka panjang terhadap mereka nanti.

JAWAPAN

Tuan Yang di-Pertua,

1. Program Imunisasi COVID-19 Kebangsaan (PICK) bagi golongan kanak-kanak berusia 5 hingga 11 tahun telah bermula pada 3 Februari 2022 dan sehingga kini, 28.9 peratus daripada keseluruhan kanak-kanak dalam kumpulan umur tersebut atau bersamaan 1,026,732 orang telah menerima dos pertama mereka.
2. Sejak bermulanya pandemik COVID-19, Kementerian Kesihatan Malaysia (KKM) telah memantau status jangkitan COVID-19 ke atas setiap golongan umur. Bagi tempoh 25 Januari 2020 hingga 6 Mac 2022, jumlah kes COVID-19 melibatkan individu berumur kurang daripada 18 tahun adalah sebanyak 748,037 kes. Daripada jumlah tersebut, sebanyak 301,268 kes melibatkan kanak-kanak berumur 5 hingga 11 tahun (40.3%). Selain itu, kes kematian akibat daripada COVID-19 juga telah dicatatkan dalam kalangan populasi berumur 18 tahun dan ke bawah iaitu berjumlah 157 kes. Daripada jumlah tersebut, 39 (24.8%) kes kematian adalah melibatkan kanak-kanak berumur 5 hingga 11 tahun.
3. KKM juga mendapati terdapat peningkatan jangkitan COVID-19 dalam kalangan kanak-kanak terutamanya setelah pembukaan sekolah pada awal tahun 2022. Kehadiran varian Omicron yang lebih mudah merebak juga menambah risiko jangkitan kepada kanak-kanak. Sehingga 5 Mac 2022, jangkitan COVID-19 dalam kalangan kanak-kanak berusia bawah 12 tahun menunjukkan peningkatan ketara apabila 123,053 orang disahkan positif virus itu semenjak Januari 2022. Terdapat juga kes yang memerlukan rawatan di hospital dan sebilangannya memerlukan rawatan intensif di Unit Rawatan Rapi (ICU).

Tuan Yang di-Pertua,

4. Melihat kepada keperluan untuk melindungi populasi kanak-kanak ini, KKM melalui Pihak Berkuasa Kawalan Dadah (PBKD) Malaysia telah

menganalisa data-data keselamatan dan keberkesanannya serta bersetuju untuk memberikan kelulusan bersyarat kepada Vaksin Comirnaty 10mcg Concentrate for Dispersion (Pfizer-BioNTech) pada 6 Januari 2022 untuk kegunaan kanak-kanak berusia 5 hingga 11 tahun. Vaksin tersebut telah menjalani kajian klinikal yang sangat ketat dan teliti bagi memastikan kualiti, keselamatan, serta keberkesanannya vaksin tersebut. Hasil dapatan kajian klinikal, vaksin ini menunjukkan keberkesanannya sebanyak 90.7% serta berupaya untuk meningkatkan tindak balas imun yang tinggi terhadap penyakit COVID-19.

5. Vaksin Comirnaty formulasi khas kanak-kanak juga telah digunakan di beberapa negara termasuklah Amerika Syarikat, Kanada, Australia dan Singapura. Real World Data melaporkan insiden miokarditis atau radang otot jantung setelah pengambilan vaksin mRNA adalah sangat rendah. Sebagai contoh, Amerika Syarikat telah melaksanakan pemberian vaksin ini hampir 8.7 juta dos menggunakan formulasi khas kanak-kanak dan data awal Adverse Event Following Immunization (AEFI), telah mendapati insiden AEFI adalah jauh lebih rendah berbanding insiden AEFI dikalangan remaja berumur 12 hingga 17 tahun.
6. Pada 3 Mac 2022 pula, PBKD telah memberikan kelulusan bersyarat bagi penggunaan vaksin CoronaVac Suspension for Injection COVID-19 Vaccine (Vero Cell), Inactivated keluaran Sinovac Life Sciences Co. Ltd., China dan Pharmaniaga Lifescience Sdn. Bhd., Malaysia kepada kanak-kanak berusia 5 hingga 11 tahun. Penilaian data yang melibatkan immuno-bridging analysis menunjukkan bahawa vaksin CoronaVac dapat menghasilkan tindakbalas imun yang lebih tinggi pada golongan kanak-kanak berbanding dengan golongan remaja dan dewasa. Hasil kajian klinikal pula menunjukkan vaksin ini adalah selamat dengan regimen 2 dos di mana satu dos adalah 0.5ml dan dos kedua diberikan 28 hari selepas hari pertama.
7. Laporan AEFI daripada negara China yang melibatkan penggunaan 211 juta dos vaksin CoronaVac di kalangan kanak-kanak dan remaja juga menunjukkan bahawa vaksin ini adalah selamat dan

kebanyakannya kesan sampingan yang dilaporkan adalah bertahap ringan dan sederhana serta bersifat sementara.

Tuan Yang di-Pertua,

8. Berkenaan AEFI ke atas penerima vaksin COVID-19 berusia 5 hingga 11 tahun pula di Malaysia pula, sehingga 25 Februari 2022, hanya 94 laporan AEFI bersamaan kadar 0.1 laporan bagi setiap 1,000 dos. Daripada 94 laporan yang diterima ini, hanya 2 laporan yang dikategorikan sebagai serius. Kesan yang paling kerap dilaporkan termasuk demam, stres terhadap suntikan atau proses vaksinasi, reaksi kegatalan pada kulit, pening dan sakit kepala. Kadar pelaporan AEFI bagi golongan kanak-kanak ini adalah lebih rendah berbanding kadar keseluruhan pelaporan AEFI (0.4 bagi setiap 1,000 dos). Bagi 2 kes serius pula, hubungkait kesan advers dengan vaksin masih perlu dinilai dan disahkan secara klinikal.

9. Semua kes serius yang dilaporkan akan disiasat secara menyeluruh oleh pasukan penyiasat yang ditubuhkan di fasiliti kesihatan yang berkenaan. Laporan penyiasatan ini seterusnya akan diserahkan kepada Jawatankuasa Farmakovigilans Khas Vaksin COVID-19 (JFK) untuk penilaian hubungkait antara kesan sampingan dan vaksin diambil berdasarkan hasil penyiasatan yang telah dijalankan. Literature review juga akan dijalankan bagi melihat laporan yang berkaitan di peringkat global. Hasil penilaian pihak JFK akan dimaklumkan kepada fasiliti kesihatan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN HAJAH FUZIAH BINTI SALLEH
[KUANTAN]**

TARIKH : 8 MAC 2022 (SELASA)

SOALAN

PUAN HAJAH FUZIAH BINTI SALLEH [KUANTAN] minta **MENTERI KESIHATAN** menyatakan jumlah kes kesan sampingan dan kematian selepas pengambilan dos penggalak dan langkah Kementerian dalam menangani isu ini yang memberi ancaman buruk kepada penerima.

JAWAPAN

Tuan Yang di-Pertua,

1. Sejak Program Imunisasi COVID-19 Kebangsaan dimulakan pada bulan Februari 2021 sehingga 25 Februari 2022, Bahagian Regulatori Farmasi Negara (NPRA) telah menerima sejumlah 25,445 laporan Kesan Advers Susulan Imunisasi (AEFI).
2. Pelaporan AEFI di kalangan penerima dos penggalak direkodkan berjumlah 1,275 bersamaan kadar 89 laporan bagi setiap sejuta dos. Ini adalah lebih rendah daripada kadar keseluruhan pelaporan AEFI (381 bagi setiap sejuta dos).
3. Daripada jumlah laporan AEFI yang diterima bagi dos penggalak ini, hanya 90 laporan (atau 7.06% daripada jumlah laporan AEFI diterima bagi dos penggalak) diklasifikasikan sebagai serius bersamaan kadar 6.3 laporan bagi setiap juta dos. NPRA telah menerima 45 laporan AEFI melibatkan kematian di kalangan penerima vaksin dos penggalak yang memerlukan penyiasatan dan penilaian.
4. Untuk makluman, NPRA menerima semua jenis laporan AEFI yang disyaki atau berkemungkinan disebabkan vaksin. Statistik yang dinyatakan ini adalah berdasarkan jumlah laporan AEFI yang diterima yang mana hubungkait kesan advers dengan vaksin masih perlu melalui proses pengesahan dan pembuktian klinikal.
5. Jawatankuasa Farmakovigilans Khas Vaksin COVID-19 (JFK) telah menjalankan penilaian ke atas 22 laporan yang telah lengkap penyiasatan dan didapati kematian tersebut tiada hubung kait dengan vaksin yang diterima. Terdapat 23 laporan lagi masih dalam proses penyiasatan sebelum boleh dibentangkan untuk penilaian oleh JFK.
6. Daripada pemantauan laporan AEFI diterima oleh NPRA setakat ini, trend dan kadar pelaporan AEFI yang melibatkan dos penggalak tidak menunjukkan sebarang peningkatan daripada apa yang dilihat semasa pemberian dos primer. Trend pelaporan yang sama juga turut dilaporkan oleh negara lain yang telah menjalankan program imunisasi

bagi dos penggalak vaksin COVID-19.

7. Berdasarkan analisis interim bagi data Kajian Surveilans Keselamatan Vaksin COVID-19) (NMRR- 21-555-59135 (IIR)) yang dijalankan oleh NPRA untuk tempoh Februari hingga November 2021, majoriti AEFI yang dilaporkan adalah ringan dan biasanya akan pulih dalam tempoh masa beberapa hari tanpa rawatan. Trend ini adalah setara dengan pelaporan yang diterima bagi dos primer tetapi dengan kadar pelaporan yang lebih rendah. Kajian ini juga mendapati bahawa bilangan laporan kes AEFI serius yang diterima susulan pengambilan dos penggalak adalah 43.7% lebih rendah berbanding susulan pemberian dos primer.
8. KKM akan terus memantau keselamatan vaksin di peringkat global dan sentiasa telus dalam melaporkan sebarang isu berkaitan keselamatan vaksin kepada masyarakat umum. Penerima vaksin yang mengalami kesan AEFI layak memohon Bantuan Khas Kewangan (BKK) yang mana pampasan akan dibayar sekiranya kesan AEFI mempunyai hubung kait dengan vaksin yang diterima.
9. Selain itu, pesakit turut diberikan rawatan berdasarkan simptom dan diagnosis pesakit dan pemantauan dan rawatan susulan juga turut diberikan. KKM telah menghasilkan "**Ministry of Health Clinical Guidelines On COVID-19 Vaccination In Malaysia**" bagi memberi informasi klinikal terkini berkenaan vaksin, kontraindikasi vaksin, kesan sampingan dan aspek-aspek klinikal yang perlu diambil kira dalam pemberian vaksin serta rawatan kecemasan jika insiden seperti anafilaksi berlaku kepada penerima vaksin.

Sekian, terima kasih.

SOALAN NO : 55

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN WONG LING BIU [SARIKEI]

TARIKH : 8 MAC 2022 (SELASA)

SOALAN

TUAN WONG LING BIU [SARIKEI] minta **MENTERI KESIHATAN** menyatakan adakah Kementerian sedang merancangkan dos keempat (dos penggalak kedua) untuk rakyat kita.

JAWAPAN

Tuan Yang di-Pertua,

1. Pada 24 Februari 2021, Kerajaan telah memulakan Program Imunisasi COVID-19 Kebangsaan (PICK) dengan pemberian vaksin *primary series* kepada individu yang layak dan kemudian diikuti dengan pemberian dos penggalak mulai 13 Oktober 2021.
2. Polisi bagi pemberian vaksin COVID-19 ini sama ada untuk *primary series* mahupun vaksin dos penggalak adalah berdasarkan kepada syor Kumpulan Kerja Teknikal (TWG) bagi pemilihan dan pemberian vaksin dan keputusan Mesyuarat Jawatankuasa Jaminan Akses Vaksin COVID-19 (JKJAV) dan mesyuarat Jawatankuasa Petugas Khas Imunisasi COVID-19 bagi vaksin dos penggalak (CITF-B).
3. Buat masa ini, Kerajaan masih belum membuat keputusan berkaitan pemberian vaksin COVID-19 secara berkala atau berterusan termasuklah ke atas kumpulan yang berisiko tinggi seperti individu rendah imun atau *immunocompromised*. Keputusan ini adalah bergantung kepada syor Kumpulan Kerja Teknikal (TWG) yang membuat penilaian data-data saintifik daripada pelbagai sumber dari dalam dan luar negara atau *real-world data* secara berterusan, termasuk juga mengambil kira syor daripada Pertubuhan Kesihatan Sedunia (WHO) serta agensi kesihatan antarabangsa yang lain.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : LISAN

DARIPADA : YB TUAN LIM KIT SIANG (ISKANDAR PUTERI)

TARIKH : 8 MAC 2022 (SELASA)

SOALAN

TUAN LIM KIT SIANG (ISKANDAR PUTERI) minta **MENTERI DALAM NEGERI** menyatakan berapa banyak permohonan kerakyatan untuk anak kelahiran ibu warganegara Malaysia yang mempunyai bapa bukan warganegara yang telah diterima oleh pihak JPN dan berapa banyak permohonan yang telah diluluskan dan ditolak sejak tahun 2020.

JAWAPAN

Tuan Yang Di Pertua,

Untuk makluman Ahli Yang Berhormat, berdasarkan rekod Jabatan Pendaftaran Negara (JPN) dari tahun 2020 hingga 15 Februari 2022, sebanyak **568 permohonan** kewarganegaraan diterima untuk individu dilahirkan di luar negara yang mempunyai ibu bertaraf warganegara berkahwin dengan bapa bertaraf bukan warganegara dan dari jumlah itu, **5 permohonan** diluluskan dan **tiada permohonan** ditolak.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : LISAN

**DARIPADA : YB TUAN SIVARASA A/L K.RASIAH
(SUNGAI BULOH)**

TARIKH : 8 MAC 2022 (SELASA)

SOALAN

TUAN R. SIVARASA (SUNGAI BULOH) minta **MENTERI DALAM NEGERI** menyatakan tindakan terhadap orang-orang macam Ustaz Idris Sulaiman yang telah naik muat dalam FB beliau Ilmu Salaf Dot Com video yang mengandungi ayat-ayat dan perkataan-perkataan yang memaki dan menghina agama bukan Islam khususnya agama Hindu dan sebagai contoh mengatakan adalah tidak wajar untuk orang Islam membantu mencuci kuil Hindu yang dikenakan banjir dan kuil adalah tempat untuk syaitan, dan kalau tindakan tidak diambil, mengapa.

JAWAPAN

Tuan Yang Di Pertua,

Kementerian Dalam Negeri memandang serius isu-isu berkaitan sensitiviti beragama dan perkauman di kalangan masyarakat majmuk di negara ini. Tindakan tegas akan diambil terhadap mana-mana individu yang melakukan kesalahan menghina, mempersenda dan memainkan isu-isu agama atau perkauman berdasarkan peruntukan undang-undang sedia ada seperti Akta Hasutan 1948, Kanun Keseksaan dan Akta Komunikasi dan Multimedia 1998.

Berhubung kes berkait video di dalam media sosial tersebut, PDRM telah membuka kertas siasatan bersabit laporan polis Sri Muda 4654/2022 bertarikh 13 Januari 2022. Siasatan sedang dijalankan di bawah seksyen 298 Kanun Keseksaan (Akta 574) iaitu pelakuan sengaja dengan niat untuk melukakan perasaan agama seseorang dan di bawah seksyen 233 Akta Komunikasi Dan Multimedia 1998 (Akta 588) ; penggunaan tidak wajar kemudahan rangkaian atau perkhidmatan rangkaian.

Kertas siasatan ini kemudian perlu dirujuk ke Jabatan Peguam Negara sebelum tindakan seterusnya boleh diambil oleh Kementerian.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI SHAMSUL ISKANDAR @
YUSRE BIN MOHD AKIN (HANG TUAH JAYA)**

TARIKH : 8 MAC 2022 (SELASA)

SOALAN

DATUK SERI SHAMSUL ISKANDAR @ YUSRE BIN MOHD AKIN [HANG TUAH JAYA] minta **MENTERI PEMBANGUNAN LUAR BANDAR** menyatakan perincian program-program pembangunan luar bandar dengan mengambil kira data-data jumlah pengangguran terkini di dalam kawasan Parlimen Hang Tuah Jaya agar program-program yang akan dijalankan tersebut mampu membuka atau memberi peluang pekerjaan kepada masyarakat.

JAWAPAN

Tuan Yang di-Pertua,

Berdasarkan statistik Laporan Survei Tenaga Buruh 2020, Jabatan Perangkaan Malaysia (DOSM), kadar pengangguran di Malaysia ialah sebanyak 4.5 peratus. Bagi Negeri Melaka, kadar pengangguran adalah sebanyak 2.2 peratus. Manakala kadar pengangguran di Parlimen Hang Tuah Jaya, adalah sebanyak 2.3 peratus.

Bagi menyokong usaha kerajaan untuk mengurangkan kadar pengangguran, salah satu fokus Kementerian ialah melalui Teras Ekonomi dalam Dasar Pembangunan Luar Bandar, 2030 (DPLB) adalah meningkatkan nilai tambah kepada sumber tempatan bagi menyokong kepelbagaian ekonomi serta menjana peluang pekerjaan dan keusahawanan di luar bandar.

Di bawah Program Desa Lestari KPLB, Kampung Pengkalan Batu, Melaka telah menerima peruntukan berjumlah RM1.0 juta dalam tempoh tahun 2015-2020 bagi melaksanakan aktiviti ekonomi termasuk pertanian, perniagaan runcit, perkhidmatan pengangkutan hasil padi, perkhidmatan parkir serta bengkel jahitan. Selain memberi manfaat kepada anggota koperasi kampung tersebut, program ini juga telah menjana peluang pekerjaan dan ekonomi sampingan bagi penduduk setempat.

Melalui RISDA, peluang pekerjaan turut dijana melalui program-program bagi pekebun kecil iaitu program Peningkatan Produktiviti dan Pembangunan Pekebun Kecil Melaka yang melibatkan kos RM27,000 serta program Pembangunan Kawasan Tanam Semula Getah Melaka dengan kos RM90,000.

Selain itu, program-program pembangunan ekonomi luar bandar di kawasan Parlimen Hang Tuah Jaya turut disokong dengan pembangunan infrastruktur luar bandar termasuk projek Jalan Luar Bandar (JALB) iaitu Naiktaraf Jalan Kampung Paya Redan dengan kos sebanyak RM34.4 juta serta membina Jalan Baru Dari Jalan Bukit Katil Ke Taman Puncak Bukit Katil dengan kos RM27.6 juta. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

DARIPADA : TUAN TEH KOK LIM [TAIPING]

TARIKH : 08 MAC 2022 (SELASA)

SOALAN

TUAN TEH KOK LIM [TAIPING] minta **MENTERI SUMBER MANUSIA** menyatakan rancangan Kementerian seterusnya dalam usaha Kerajaan meningkatkan gaji minimum untuk 5 tahun yang akan datang.

JAWAPAN

Tuan Yang di-Pertua,

Akta Majlis Perundingan Gaji Negara 2011 [Akta 732] memperuntukkan supaya Perintah Gaji Minimum dikaji sekurang-kurangnya sekali dalam tiap-tiap dua tahun.

Dalam membuat kajian semula, Jawatankuasa Teknikal Perundingan Gaji Negara akan mengadakan perundingan awam dan sesi libat urus yang melibatkan wakil-wakil majikan, pertubuhan majikan, wakil pekerja, kesatuan sekerja dan orang awam bagi mendapatkan input dan maklumat tentang impak pelaksanaan Perintah Gaji Minimum.

Majlis Perundingan Gaji Negara sentiasa menggunakan pendekatan seimbang (*balanced approach*) dengan mengambil kira kepentingan pihak majikan, pekerja dan kerajaan sebelum mengemukakan syor untuk pertimbangan dan persetujuan Kerajaan. Peningkatan gaji minimum sewajarnya dilaksanakan secara berperingkat agar tidak memberi tekanan dan membebankan majikan serta menjelaskan operasi syarikat dan mendedahkan pekerja kepada risiko kehilangan pekerjaan.

Selain itu, peningkatan kadar gaji minimum yang terlalu tinggi dan drastik boleh menjelaskan daya saing negara lalu pasaran buruh negara akan berdepan dengan cabaran untuk mencipta pekerjaan baharu yang berkualiti dan berkemahiran tinggi.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : LISAN

DARIPADA : YB TUAN LIM LIP ENG (KEPONG)

TARIKH : 8 MAC 2022 (SELASA)

SOALAN

TUAN LIM LIP ENG (KEPONG) minta **MENTERI DALAM NEGERI** menyatakan dasar agensi-agensi penguatkuasa terutamanya Suruhanjaya Pencegahan Rasuah Malaysia dan Polis Diraja Malaysia dalam menentukan kategori suspek dan tertuduh yang perlu memakai baju lokap dan gari bagi mengelakkan wujudnya amalan pilih kasih dan rasuah. Kos beli dan mencuci setiap baju tersebut.

JAWAPAN

Tuan Yang Di-Pertua,

Dalam konteks pengurusan suspek/tahanan yang ditahan di dalam lokap Polis Diraja Malaysia (PDRM), orang kena tahan (OKT) dikategorikan kepada lelaki dewasa, wanita dewasa, juvana lelaki dan juvana wanita. Pegawai Penjaga/Timbalan Pegawai Penjaga Lokap bertanggungjawab memastikan semua OKT yang ditahan di lokap PDRM memakai pakaian yang telah ditetapkan mengikut piawaian yang telah ditentukan oleh pasukan.

PDRM telah menetapkan satu penyelarasan bagi pakaian OKT yang khusus bagi tujuan mengelakkan berlakunya kejadian-kejadian yang tidak diingini, memenuhi keperluan dan kesesuaian tahanan semasa berada di lokap serta

SOALAN NO : 61

membolehkan pegawai polis mengawal dengan lebih teratur pergerakan OKT semasa siasatan/ perbicaraan mahkamah dan pergerakan OKT dari satu tempat ke satu tempat.

Pemakaian baju lokap di semua lokap-lokap PDRM adalah seragam dan dibekalkan oleh Jabatan Logistik dan Teknologi (JLog) kepada semua kontingen. Perbezaan warna baju yang dipakai oleh seseorang OKT semasa ditahan di lokap adalah mengikut kepada jenis kesalahan yang dilakukan seperti berikut:

- a. **Warna jingga** - pakaian kepada OKT lelaki dan wanita yang terlibat dengan kes jenayah berat; dan
- b. **Warna ungu** - pakaian kepada OKT lelaki dan wanita yang terlibat dengan lain-lain kes jenayah selain daripada kes jenayah berat.

Bagi pengurusan kos pembelian baju lokap dan kos mencuci setiap baju OKT di lokap adalah seperti berikut:

Pembelian baju tahanan

- a. Kos pembelian bagi baju OKT akan diuruskan oleh pihak Jabatan Logistik dan Teknologi (JLog);
- b. Baju lokap akan diuruskan oleh kontraktor yang dilantik oleh pihak Kerajaan; dan
- c. Kos bagi pembelian/penyediaan sepasang baju lokap adalah RM79.45 yang melibatkan seluar dan baju.

Pencucian baju tahanan (Dobi)

- a. Dobi Basah - RM4.60/Kg
- b. Dobi Kering - RM4.70/Kg

Penggunaan gari

Garis panduan SOP penggunaan gari terhadap OKT adalah tertakluk kepada Perintah Tetap Ketua Polis Negara Bahagian ‘A’ 120. Gari digunakan bertujuan membawa OKT ke mahkamah untuk reman, sambung reman, boleh tuduh semula, boleh jamin polis, tuduh, siasatan oleh pegawai penyiasat atau mengiring OKT ke klinik/hospital bagi mendapatkan rawatan dan sebagainya. Jenis-jenis gari adalah seperti berikut:

- a. gari individu (*single handcuff*);
- b. gari berantai 3 pasang (*3 man gang handcuff*);
- c. gari berantai 5 pasang (*5 man gang handcuff*);
- d. gari berantai individu (*chainned single handcuff*);
- e. gari kaki individu (*individual legcuff*); dan
- f. gari plastik individu (*disposable plastic handcuff*).

Penggunaan gari adalah mengambil kira faktor-faktor seperti berikut:

- a. Jenis kesalahan/ kesalahan dimana tahanan ditangkap;
- b. Sikap dan pemikiran tahanan; dan
- c. Keadaan dan jangka masa mengiring.

Pengecualian penggunaan gari kepada kanak-kanak, pesalah wanita/mengandung, pesalah juvana, dan pesalah uzur atau lanjut usia. Walau bagaimanapun, sekiranya mereka bertindak agresif dan boleh mendatangkan bahaya kepada petugas pengiring/orang lain penggunaan gari adalah wajar.

Bagi Suruhanjaya Pencegahan Rasuah Malaysia (SPRM), pihak Kementerian tidak dapat mengulas lanjut berhubung garis panduan agensi berkenaan memandangkan agensi tersebut berada di bawah seliaan Jabatan Perdana Menteri.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN KESAVAN A/L
SUBRAMANIAM [SUNGAI SIPUT]**

TARIKH : 8 MAC 2022 (SELASA)

SOALAN

TUAN KESAVAN A/L SUBRAMANIAM [SUNGAI SIPUT] minta **MENTERI KESIHATAN** menyatakan sama ada Encik Abu Bakar a/l Nadarsha No.KP: 550904-08-5905 didaftar sebagai kes yang mengalami penyakit serius dalam tempoh 4 minggu selepas vaksin COVID-19. Beliau telah dirawat di Hospital Sungai Siput.

JAWAPAN

Tuan Yang di-Pertua,

1. Untuk makluman Ahli Yang Berhormat, KKM telah menjalankan siasatan awalan ke atas kes ini. Hasil siasatan mendapati individu yang dinyatakan tersebut telah lengkap menerima dos primer vaksin COVID-19 pada 8 Julai 2021 dan 29 Julai 2021 serta dos penggalak pada 13 Disember 2021. Pesakit telah hadir ke Hospital Sungai Siput pada 16 Disember 2021 disebabkan oleh pening kepala dan akhirnya telah dimasukkan ke hospital.

2. Siasatan terperinci masih sedang dilaksanakan oleh fasiliti kesihatan yang terlibat sebelum dibentangkan ke Jawatankuasa Farmakovigilans Khas Vaksin COVID-19 untuk menilai perkaitan antara kejadian yang berlaku dengan pemberian vaksin. Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN ISNARAISAH MUNIRAH
MAJILIS [BELUD]**

TARIKH : 8 MAC 2022 (SELASA)

SOALAN

**PUAN ISNARAISAH MUNIRAH MAJILIS minta MENTERI
KESIHATAN menyatakan :-**

- (a) adakah fungsi sel-b dan sel-t telah berkurangan sepermulaan kadar antibodi menurun bagi tempoh tiga hingga enam bulan selepas suntikan kedua dos vaksin; dan
- (b) adakah benar vaksin COVID-19 telah mewujudkan memori yang dihasilkan sel-b dan sel-t yang bertanggungjawab menghasilkan antibodi dengan cepat yang boleh bertahan selama beberapa tahun dan jika benar, mengapa dos penggalak masih lagi perlu diberikan kepada orang dewasa yang sihat.

JAWAPAN

Tuan Yang di-Pertua,

1. Bilangan dan fungsi sel B dan sel T yang dihasilkan selepas menerima dos lengkap vaksin COVID-19 mula menurun selepas tiga hingga enam bulan. Ini berdasarkan banyak kajian penyelidikan yang diterbitkan secara saintifik berkaitan imuniti selepas penerimaan vaksin COVID-19.
2. Sel memori yang dihasilkan oleh sel B dan sel T selepas penerimaan vaksin COVID-19 boleh bertahan selama beberapa bulan. Walau bagaimanapun, bilangan sel B dan sel T mula menurun selepas tiga hingga enam bulan selepas penerimaan vaksin COVID-19 dan seterusnya menyebabkan fungsi sel ini kurang efektif bagi tindak balas terhadap virus COVID-19. Oleh itu, dos penggalak perlu diberikan kepada orang dewasa bagi meningkatkan fungsi sel B dan sel T terhadap virus COVID-19.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DR. KELVIN YII LEE WUEN [
BANDAR KUCHING]**

TARIKH : 8 MAC 2022 (SELASA)

SOALAN

DR. KELVIN YII LEE WUEN [BANDAR KUCHING] minta **MENTERI KESIHATAN** menyatakan berapa peratus pengguna MySejahtera menggunakan MySJ Trace dan pelan Kementerian untuk menambah baik MySJ Trace dan menyelesaikan masalah yang timbul. Berapa jumlah kes kontak rapat yang berjaya dikesan oleh MySJ Trace ini di seluruh negara.

JAWAPAN

Tuan Yang di-Pertua,

1. Setakat 15 Februari 2022, seramai 5,971,117 juta pengguna telah mengaktifkan ciri MySJ Trace. Penggunaan MySJ Trace memperkasakan individu yang telah disahkan positif untuk memuat naik interaksi bagi memaklumkan kontak sebagai kontak secara automatik.

2. Sehingga 15 Februari 2022, seramai 11,212 kes positif telah memuat naik interaksi mereka dan 124,643 kontak telah dikenal pasti melalui ciri ini. KKM sentiasa menilai keberkesanan dan menambah baik aplikasi MySejahtera termasuklah MySJ Trace.

Sekian, terima kasih.

SOALAN NO : 64

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : DATUK SERI DR. HAJI DZULKEFLY BIN AHMAD [KUALA SELANGOR]

TARIKH : 8 MAC 2022 (SELASA)

SOALAN

DATUK SERI DR. HAJI DZULKEFLY BIN AHMAD [KUALA SELANGOR] minta **MENTERI KESIHATAN** menyatakan pengesahan jika vaksinasi COVID-19 ini memerlukan dos ke-4, ke-5 dan seterusnya, adakah Kementerian akan kekal untuk membayai kos sepenuhnya.

JAWAPAN

Tuan Yang di-Pertua,

1. Pada 24 Februari 2021, Kerajaan telah memulakan Program Imunisasi COVID-19 Kebangsaan (PICK) dengan pemberian vaksin *primary series* kepada individu yang layak dan kemudian diikuti dengan pemberian dos penggalak mulai 13 Oktober 2021.
2. Polisi bagi pemberian vaksin COVID-19 ini sama ada untuk *primary series* mahupun vaksin dos penggalak adalah berdasarkan kepada syor Kumpulan Kerja Teknikal (TWG) bagi pemilihan dan pemberian vaksin dan keputusan Mesyuarat Jawatankuasa Jaminan Akses Vaksin COVID-19 (JKJAV) dan mesyuarat Jawatankuasa Petugas Khas Imunisasi COVID-19 bagi vaksin dos penggalak (CITF-B).

3. Buat masa ini, Kerajaan masih belum membuat keputusan berkaitan pemberian vaksin COVID-19 secara berkala atau berterusan termasuklah ke atas kumpulan yang berisiko tinggi seperti individu rendah imun atau *immunocompromised*. Keputusan ini adalah bergantung kepada syor Kumpulan Kerja Teknikal (TWG) yang membuat penilaian data-data saintifik daripada pelbagai sumber dari dalam dan luar negara atau *real-world data* secara berterusan, termasuk juga mengambil kira syor daripada Pertubuhan Kesihatan Sedunia (WHO) serta agensi kesihatan antarabangsa yang lain.
4. Berhubung dengan pembiayaan kos vaksinasasi pada masa hadapan, perkara tersebut masih belum dibincangkan memandangkan ketika ini, PICK memberikan fokus bagi menjayakan pemberian dos penggalak yang diberikan secara percuma kepada semua penduduk dewasa di Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN SYED SADDIQ BIN SYED ABDUL
RAHMAN [MUAR]**

TARIKH : 08 MAC 2022 (SELASA)

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan pelan jangka pendek dan panjang untuk menangani perkembangan inflasi dalam negara. Apa yang Kementerian akan lakukan untuk kurangkan harga barang asas harian dan adakah langkah itu termasuk membangunkan mekanisme penetapan harga siling dan pemberian subsidi yang tetap berbanding ad-hoc untuk menghadapi isu inflasi seiring perkembangan jangka masa pendek, pertengahan dan panjang dalam negara.

JAWAPAN

Tuan Yang di-Pertua,

Kenaikan harga barang yang berlaku pada ketika ini dipengaruhi oleh pelbagai faktor yang menyumbang kepada perubahan harga barang di pasaran antaranya faktor permintaan dan penawaran, peningkatan harga minyak mentah di pasaran dunia terutamanya petroleum, perubahan cuaca dan bencana alam, kos pengimportan yang tinggi terutamanya bagi bahan makanan, peningkatan kos pengeluaran dan sebagainya.

Kebergantungan Malaysia dengan barang import terutama bahan-bahan makanan menyebabkan negara kita juga terkesan dengan kenaikan harga di peringkat global. Sebagai contoh, kenaikan harga ayam yang dialami ketika ini antaranya dipengaruhi oleh faktor kenaikan harga kos input makanan ternakan yang diimport dari Amerika Syarikat dan Argentina iaitu jagung dan *soybeans*.

Begitu juga lain-lain bahan makanan yang diimport seperti bawang merah, cili merah, kobis bulat, gandum dan lain-lain bahan makanan yang bergantung kepada pengimportan dari negara luar demi memenuhi keperluan populasi rakyat Malaysia.

Namun sebagai Kerajaan yang prihatin, Kementerian telah melaksanakan pelbagai inisiatif untuk mengurangkan impak kenaikan harga barang kepada rakyat. Antara inisiatif-inisiatif yang telah dilaksanakan adalah:

- i) Pelaksanaan **Program Jualan Keluarga Malaysia (PJKM)** di 222 kawasan Parlimen. PJKM dianjurkan setiap minggu secara serentak di lokasi yang berdekatan dengan golongan sasar B40 dan M40 bagi membantu golongan berkenaan mendapatkan barang keperluan harian seperti ayam, ikan, telur, sayur-sayuran, minyak masak, gula, tepung, beras serta barangan proses dengan harga sehingga 20 peratus lebih murah daripada harga pasaran setempat;
- ii) Melaksanakan **Skim Harga Maksimum Musim Perayaan (SHMMP)** dan juga **Skim Harga Maksimum Keluarga Malaysia (SHMKM)** bagi membantu rakyat mendapatkan harga barang keperluan pada paras

harga yang berpatutan dan munasabah, terutamanya semasa permintaan tinggi barang-barang tertentu pada musim-musim perayaan utama;

- iii) Pelaksanaan **Program Penyeragaman Harga**. Ini bagi membolehkan penduduk di luar bandar dan pedalaman membeli barang keperluan asas seperti beras, gula, tepung gandum, minyak masak, LPG dan Community Drumming (petrol dan diesel) pada harga yang ditetapkan atau dikawal oleh Kerajaan seperti mana di bandar;
- iv) Mempergiat **penguatkuasaan Akta Kawalan Harga dan Antipencatutan 2011** yang bertujuan mengawal peniaga daripada mengambil keuntungan yang tidak munasabah dan secara tidak langsung barang dapat dijual pada harga berpatutan oleh peniaga; dan
- v) Menguatkuasa **Perintah Kawalan Harga (Penandaan Harga oleh Penjual Runcit) 1993** dengan mewajibkan peniaga meletak tanda harga bagi membantu rakyat membuat perbandingan harga dan akhirnya membuat pilihan harga yang lebih murah serta berpatutan.

Dalam masa yang sama, Kementerian juga kerap **mengadakan perundingan dengan pihak yang berkaitan antaranya pihak MAFI** bagi mencapai win-win situation. Selain daripada menjaga kebajikan pengguna, Kementerian berperanan memastikan pihak industri tidak mendapat impak negatif dalam setiap perancangan yang dibuat oleh Kerajaan terutama inisiatif kawalan harga. Di samping pengguna menikmati harga yang terkawal, dalam masa yang sama juga pihak industri berupaya untuk mendapat keuntungan yang berpatutan.

Selain mengawal harga barang, Kementerian turut giat memberikan advokasi kepada pengguna tentang bagaimana cara untuk menjadi pengguna yang bijak melalui kuasa beli pengguna di samping menyediakan pelbagai saluran untuk pengguna membuat aduan berhubung salah laku perniagaan yang tidak beretika.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : DR. AZMAN BIN ISMAIL [KUALA KEDAH]

TARIKH : 8 MAC 2022 (SELASA)

SOALAN

DR. AZMAN BIN ISMAIL [KUALA KEDAH] minta **MENTERI KESIHATAN** menyatakan pendirian Kementerian Kesihatan mengenai keberkesanan vaksin COVID-19 ke atas varian Omicron. Apakah Kementerian rasakan ianya perlu. Mohon diberikan data yang dirujuk oleh Kementerian.

JAWAPAN

Tuan Yang di-Pertua,

1. KKM telah memaklumkan menerusi kenyataan media Ketua Pengarah Kesihatan bertarikh 11 Februari 2022 bahawa sebanyak 188 kes baharu *Variant of Concern* (VOC) telah dilaporkan daripada 9 Februari 2022 hingga 11 Februari 2022 yang terdiri daripada 69 kes varian Delta dan 119 kes varian Omicron. Kesemua 188 kes baharu ini telah dikenalpasti oleh *Institute for Medical Research* (IMR). Jumlah kumulatif kes yang dijangkiti oleh virus SARS-CoV-2 yang dikategorikan sebagai VOC dan *Variant of Interest* (VOI) adalah sebanyak 7,586 kes dan majoriti adalah disebabkan varian Delta dan diikuti Omicron dan lain-lain varian.

2. Seperti yang sedia maklum, varian Delta berupaya menyebabkan gejala yang lebih serius kepada pesakit yang menyebabkan peningkatan

kadar kemasukan ke wad, ICU dan kematian. Secara keseluruhannya, varian Omicron mengakibatkan jangkitan yang lebih ringan. Varian Omicron mengandungi 45- 52 mutasi pada keseluruhan genom dan terdapat 26-32 mutasi pada spike protein. Pihak Pertubuhan Kesihatan Sedunia (WHO) juga telah mengesahkan bahawa Omicron mempunyai kadar kebolehjangkitan yang tinggi disebabkan ciri- ciri mutasi yang membolehkannya melekat pada sel manusia dengan lebih mudah. Selain daripada itu varian ini juga boleh mengurangkan tindak balas antibodi dan berupaya untuk menjangkiti mereka yang telah dijangkiti atau divaksinasi sebelum ini.

3. Terdapat beberapa kajian yang dijalankan menunjukkan keberkesanan vaksin dan dos penggalak ke atas varian Omicron antaranya:

- i. Kajian *Neutralizing Antibodies Against The SARS-Cov-2 Delta And Omicron Variants Following Heterologous Coronavac Plus BNT162b2 Booster Vaccination* yang mengkaji *humoral immunity* melaporkan bahawa varian Omicron dikaitkan dengan *immune escape* daripada vaksin atau imuniti yang disebabkan oleh jangkitan, dan ini seterusnya memberikan saranan bagi memberikan dos penggalak bagi memerangi kesan varian Omicron yang mudah merebak ini.
- ii. Kajian di South Africa telah melaporkan bahawa vaksin Comirnaty (Pfizer-BioNTech) adalah berkesan dalam mengurangkan kemasukan ke hospital disebabkan oleh jangkitan COVID-19 termasuklah varian Omicron.
- iii. *COVID-19 vaccine surveillance report (week 7)* bertarikh 17 February 2022 oleh *Health Security Agency , United Kingdom (UK)* merupakan laporan yang dikeluarkan berdasarkan *Real world Data* tentang keberkesanan vaksin daripada kajian- kajian dalam populasi UK yang mana varian Omicron turut mendominasi jangkitan COVID-19 di United Kingdom ketika ini. Secara keseluruhannya melaporkan vaksin- vaksin yang digunakan masih berkesan ke atas varian Omicron.

4. Berdasarkan bukti-bukti saintifik yang dikemukakan, terdapat keperluan untuk meneruskan Program Imunisasi COVID-19 Kebangsaan termasuk pemberian dos penggalak kepada populasi dewasa dan juga PICK-Remaja & PICKids bagi memberikan perlindungan yang optimum kepada seluruh keluarga Malaysia. Perhatian perlu diberikan kerana pada ketika ini kita masih lagi berperang dengan dua jenis VoC di negara kita termasuk Varian Delta & Varian Omicron yang mendominasi jangkitan COVID- 19 di Malaysia.
5. Oleh itu, selaras dengan saranan *SAGE WHO*, objektif utama penggunaan vaksin dalam konteks global adalah untuk mengelakkan penyakit yang lebih teruk sehingga membawa kepada kematian, serta memastikan sistem kesihatan awam kekal teguh dan tidak lumpuh. Selain daripada itu, perhatian juga perlu diberikan untuk mengurangkan morbiditi termasuklah sewaktu pasca COVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

DARIPADA : DR. AZMAN BIN ISMAIL [KUALA KEDAH]

TARIKH : 08 MAC 2022 (SELASA)

SOALAN

DR. AZMAN BIN ISMAIL [KUALA KEDAH] minta **MENTERI SUMBER MANUSIA** menyatakan sama ada Kerajaan akan mengkaji kembali paras gaji minima pekerja. Ini adalah kerana kos kehidupan telah meningkat dengan tinggi pada masa sekarang.

JAWAPAN

Tuan Yang di-Pertua,

Di bawah Seksyen 25(1), Akta Majlis Perundingan Gaji Negara 2011 [Akta 732], Majlis dikehendaki mengkaji semula Perintah Gaji Minimum sekurang-kurangnya sekali dalam setiap dua tahun. Kajian semula Perintah Gaji Minimum 2020 telahpun dilaksanakan oleh Jawatankuasa Teknikal Perundingan Gaji Negara dan dapatan kajian telah dibentangkan kepada Majlis Perundingan Gaji Negara dalam mesyuaratnya pada 18 November dan 9 Disember 2021.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS TAHUN 2022**

PERTANYAAN : JAWAB LISAN

DARIPADA : DR. LEE BOON CHYE [GOPENG]

TARIKH : 08 MAC 2022 (SELASA)

SOALAN

DR. LEE BOON CHYE [GOPENG] minta **MENTERI SUMBER MANUSIA** menyatakan sama ada gaji minima sedia ada akan dinaikkan sejajar dengan kadar inflasi.

JAWAPAN

Tuan Yang di-Pertua,

Kerajaan akan menambahkan kadar gaji minima yang dapat meningkatkan pendapatan asas pekerja terutamanya pekerja kategori paling bawah yang terkesan dengan peningkatan kos sara hidup semasa.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI MOHD REDZUAN MD
YUSOF [ALOR GAJAH]**

TARIKH : 8 MAC 2022

SOALAN

minta **MENTERI PEMBANGUNAN USAHAWAN DAN KOPERASI** menyatakan apakah inisiatif Kerajaan untuk menggalakkan implementasi ramalan perubahan iklim di dalam setiap perancangan dan keputusan terhadap perniagaan usahawan memandangkan cuaca yang sedang kita hadapi tidak menentu.

JAWAPAN

Tuan Yang di-Pertua,

Bagi tempoh jangka masa panjang, Rancangan Malaysia Kedua Belas (RMK-12) telah menggariskan strategi bagi mempertingkat daya tahan terhadap perubahan iklim bagi mengurangkan risiko bencana yang boleh menjelaskan aktiviti ekonomi dan perniagaan Perusahaan Mikro, Kecil dan Sederhana (PMKS). Melalui strategi ini, impak perubahan iklim dan risiko bencana akan diambil kira dalam perancangan dan pelaksanaan dasar bagi membolehkan tindakan diambil berdasarkan penilaian bukti dan risiko. Selain itu, perancangan RMK-12 juga menggalakkan supaya Matlamat Pembangunan Lestasi (SDG) dan prinsip kelestarian meliputi Persekutaran, Sosial dan Tadbir Urus (ESG) digunakan oleh sektor awam dan swasta dalam membuat keputusan.

Untuk tindakan pelaksanaan dalam tempoh jangka pendek, Kementerian melalui TEKUN Nasional sedang menerokai peluang kerjasama dengan syarikat insurans tempatan bagi menyediakan cadangan skim insurans perniagaan kepada usahawan TEKUN yang bertujuan melindungi perniagaan daripada sebarang risiko keadaan luar jangka seperti bencana banjir. Selain itu, Institut Keusahawanan Negara (INSKEN) juga menyediakan modul bimbingan meliputi Pengurusan Risiko dalam perniagaan bagi usahawan mengenalpasti pelbagai risiko termasuk bencana banjir dan persediaan usahawan mengurangkan kesan negatif kepada perniagaan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : DATO' SRI TIONG KING SING [BINTULU]

TARIKH : 8 MAC 2022 (SELASA)

SOALAN

DATO' SRI TIONG KING SING [BINTULU] minta MENTERI KESIHATAN menyatakan:

- (a) apakah gabungan vaksin COVID-19 Sinovac dan dos penggalak Pfizer kurang berkesan lawan Omicron dan menghasilkan imuniti yang rendah?
- (b) apakah tindakan Kementerian berhubung laporan 1,047 kes Kesan Advers Susulan Imunisasi (AEFI) berkait dengan vaksin COVID-19 Pfizer seperti yang dilaporkan Bahagian Regulatori Farmasi Negara (NPRA)?

JAWAPAN

Tuan Yang di-Pertua,

1. Sehingga kini, gabungan vaksin COVID-19 Sinovac dan dos penggalak Comirnaty (Pfizer-BioNTech) didapati berkesan dalam melawan varian Omicron dan menghasilkan imuniti yang lebih tinggi berbanding penggunaan vaksin Sinovac di kalangan penerima dos primer vaksin Sinovac.
2. Ini dibuktikan dengan hasil dapatan dua kajian yang telah dijalankan bagi membandingkan tahap imuniti penerima dos penggalak *heterologous* dan *homologous* di kalangan penerima vaksin primer

Sinovac.

3. Hasil dapatan kajian di Hong Kong SAR bertajuk '*Neutralizing antibodies against the SARS-CoV-2 Omicron variant following homologous and heterologous CoronaVac or BNT162b2 vaccination*' mendapati kumpulan penerima vaksin primer sinovac yang diberikan dos penggalak Pfizer menunjukkan peningkatan tahap peneutralan antibodi terhadap varian Omicron selepas 3-5 minggu. Sebaliknya, kebanyakkan penerima vaksin primer Sinovac yang menerima dos penggalak Sinovac secara *homologous*, tidak menunjukkan sebarang tindak balas peneutralan antibodi terhadap varian Omicron.
4. Kajian lain bertajuk '*Heterologous versus homologous COVID-19 booster vaccination in previous recipients of two doses of CoronaVac COVID-19 vaccine in Brazil*' melaporkan bahawa penggunaan dos penggalak secara *heterologous* (dos penggalak yang digunakan adalah Pfizer atau Janssen) mencatatkan peningkatan tahap peneutralan antibodi yang ketara bagi kes varian Delta dan Omicron di mana sekurang-kurangnya 90% penerima menjadi seropositif. Bagi penggunaan dos penggalak Sinovac secara *homologous* menunjukkan tindak balas yang lebih rendah terhadap Omicron, di mana hanya 35% penerima menjadi seropositif.
5. KKM akan terus memantau perkembangan COVID-19 termasuk varian Omicron, keberkesanan serta keselamatan vaksin COVID-19 berdasarkan bukti- bukti saintifik di peringkat global dan juga tempatan bagi memastikan keluarga Malaysia menerima perlindungan yang optimum daripada wabak COVID- 19.
6. Sejak Program Imunisasi COVID-19 Kebangsaan (PICK) dimulakan pada 24 Februari 2021 sehingga 25 Februari 2022, sebanyak 1,763 laporan (bersamaan kadar 26 laporan bagi setiap sejuta dos) dikategorikan sebagai AEFI serius telah diterima. Daripada jumlah tersebut, sebanyak 1,047 laporan kesan advers adalah melibatkan vaksin jenis Pfizer.
7. Setiap laporan AEFI serius yang diterima oleh Bahagian Regulatori Farmasi Negara (NPRA) akan disiasat dengan teliti dan menyeluruh oleh pasukan penyiasat yang ditubuhkan. Siasatan ini akan

mengambil kira laporan perubatan pesakit, laporan ujian yang berkaitan dan laporan bedah siasat sekiranya ada, daripada fasiliti yang terlibat.

8. Seterusnya penilaian hubung kait antara kesan dan vaksin yang diambil akan dijalankan oleh Jawatankuasa Farmakovigilans Khas Vaksin COVID-19 (JFK). Ahli-ahli JFK terdiri daripada pakar-pakar daripada pelbagai bidang termasuk kardiologi, imunologi, hematologi, neurologi, perubatan dalaman, patologi, penyakit berjangkit, geriatrik dan forensik dari fasiliti KKM, universiti awam dan swasta. *Literature review* juga akan dijalankan bagi melihat laporan yang berkaitan di peringkat global. Hasil penilaian pihak JFK akan dimaklumkan kepada fasiliti kesihatan.
9. Seterusnya, semua laporan akan dibentangkan kepada Jawatankuasa Penasihat Kesan Advers Ubat Kebangsaan (MADRAC) sebelum dihantar kepada pangkalan data global *World Health Organisation* (WHO).
10. Semua laporan AEFI dan maklumat yang diterima oleh NPRA termasuk isu keselamatan di peringkat global merupakan sumber maklumat penting dalam menilai risiko keselamatan vaksin yang sedang digunakan bagi memastikan nisbah manfaat dan risiko (*benefit-risk ratio*) vaksin-vaksin ini masih positif. Sekiranya sebarang isu keselamatan dapat disahkan, cadangan untuk melaksanakan tindakan regulatori terhadap penggunaan vaksin akan dikemukakan kepada Pihak Berkuasa Kawalan Dadah (PBKD) jika perlu.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS TAHUN 2022**

PERTANYAAN : JAWAB LISAN

DARIPADA : DATUK SERI PANGLIMA BUNG MOKTAR BIN RADIN [KINABATANGAN]

TARIKH : 08 MAC 2022 (SELASA)

SOALAN

DATUK SERI PANGLIMA BUNG MOKTAR BIN RADIN [KINABATANGAN] minta **MENTERI SUMBER MANUSIA** menyatakan perancangan Kementerian dalam mengawal atau mengurangkan bilangan pekerja yang diberhentikan ekoran pandemik COVID-19.

JAWAPAN

Tuan Yang Di Pertua,

Berdasarkan laporan yang dikeluarkan oleh Sistem Insurans Pekerjaan, Pertubuhan Keselamatan Sosial, seramai 5,761 orang pekerja telah kehilangan pekerjaan bagi tempoh 1 Januari 2022 sehingga 11 Februari 2022.

Kerajaan telah melaksanakan beberapa perancangan dalam mengawal atau mengurangkan bilangan pekerja yang diberhentikan ekoran pandemik COVID-19 antaranya adalah:

- i. Program JaminKerja-Insentif Penggajian di bawah Sistem Insurans Pekerjaan yang dijangka akan memanfaatkan 300,000 pencari kerja dari seluruh negara;
- ii. Program Perantisan kesinambungan kejayaan pada tahun 2021, program ini telah diteruskan dengan pemberian insentif RM900 sebulan untuk tempoh enam bulan kepada majikan yang menggajikan golongan perantis lepasan sekolah dan graduan berumur 18 hingga 30 tahun dalam jawatan Eksekutif;
- iii. mempergiatkan beberapa program bagi menggalakkan penyertaan tenaga kerja serta memastikan pengambilan pekerja dapat dilaksanakan dengan berkesan melalui Program Karnival Kerjaya, Program Insentif Pengambilan Pekerja dan Program latihan kemahiran semula dan peningkatan kemahiran melalui Penyedia Latihan yang dilantik;

- iv. **Program-program bagi peningkatan modal insan dan kebolehpasaran pekerja seperti khidmat kaunseling kerjaya, pemprofilan kemahiran, penulisan *resume*, latihan persediaan temuduga, latihan kemahiran bahasa dan penyampaian serta seminar pekerjaan bagi mereka yang mencari pekerjaan;**
- v. Meluaskan **Elaun Mencari Pekerjaan meliputi golongan yang tidak mencarum dengan PERKESO termasuklah graduan baharu, lepasan sekolah dan pekerja sektor tidak formal.** Pencari kerja yang belum mencarum dengan PERKESO perlu mendaftar di Portal Pekerjaan Negara, ***MyFutureJobs*** dan perlu menghadiri temuduga terbuka sekurang-kurangnya tiga kali dalam tempoh dua bulan. **Insentif EMP akan diberikan sebanyak RM300 sebulan.** Sekiranya pencari kerja kembali bekerja atau mendapat pekerjaan melalui MyFutureJobs, **jumlah insentif sebanyak RM400** akan turut diberikan;
- vi. Melancarkan inisiatif **PENJANA HRDCorp.** Lima skim telah diperkenalkan yang terdiri daripada ***Place & Train, B40 Development, SME Development, Industrial Revolution 4.0*** dan **Gerak Insan Gemilang (GIG)**. Skim-skim ini diwujudkan untuk membantu rakyat mendapat penempatan pekerjaan, *self-employed* serta menambah dan meningkatkan kemahiran mereka. Sehingga Februari 2022, sebanyak **85,527 pelatih** bagi mengikuti skim-skim yang melibatkan penempatan pekerjaan dan pekerjaan kendiri ini;
- vii. menubuhkan **HRDCorp Placement Centre** yang berperanan sebagai platform untuk memadankan pekerja dengan peluang pekerjaan yang tersedia oleh majikan. Sehingga 31 Disember 2021, sebanyak **55,186 peluang pekerjaan tersedia** melalui HPC dan lebih **4,000 pekerja berjaya** ditempatkan melalui inisiatif ini.

SOALAN NO : 72

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : YB TUAN NIK MOHAMAD ABDUH BIN NIK
ABDUL AZIZ (BACHOK)**

TARIKH : 8 MAC 2022 (SELASA)

SOALAN

TUAN NIK MOHAMAD ABDUH BIN NIK ABDUL AZIZ (BACHOK) minta MENTERI PERUMAHAN DAN KERAJAAN TEMPATAN menyatakan perancangan jangka pendek dan jangka panjang mengenai isu pencemaran bau busuk di tapak pelupusan sampah khususnya di kawasan Bachok.

JAWAPAN

Tuan Yang di-Pertua,

Untuk makluman Ahli Yang Berhormat, Kementerian Perumahan dan Kerajaan Tempatan (KPKT) mengambil maklum berkenaan isu pencemaran bau busuk di tapak pelupusan sampah di Bachok. Perkara ini merupakan isu alam sekitar yang memberi impak ke atas kesejahteraan dan kesihatan masyarakat serta perlu diberi perhatian serius oleh semua pihak berkepentingan.

Perkhidmatan pengurusan sisa pepejal dan pembersihan awam termasuk operasi tapak pelupusan di Bachok adalah di bawah seliaan Pihak Berkuasa Tempatan (PBT) iaitu Majlis Perbandaran Kota Bharu Bandar Raya Islam memandangkan negeri Kelantan tidak menerima pakai Akta Pengurusan Sisa Pepejal dan Pembersihan Awam 2007 (Akta 672). Berdasarkan maklumat daripada Pejabat Setiausaha Negeri Kelantan, Kerajaan Negeri Kelantan melalui anak syarikat milik penuh Perbadanan Menteri Besar Kelantan (PMBK) iaitu Kelantan Utilities Mubaarakan Holdings Sdn. Bhd. (KUMH) bersama dengan Pengurusan Sisa Pepejal Mubaarakan Sdn. Bhd. (PSPM) iaitu anak syarikat kepada KUMH telah mempunyai perancangan jangka masa pendek dan jangka masa panjang bagi mengurangkan pencemaran bau di Tapak Pelupusan Beris Lalang, Bachok, Kelantan. Perancangan tersebut adalah seperti berikut:

(i) Perancangan Jangka Pendek:

- (a) melakukan *capping* atau *Top Soil Cover* yang mana sebanyak 450 tan (minimum) tanah merah diimport dari luar pada setiap bulan untuk menutup sisa pepejal yang telah dimampatkan;
- (b) menutup 60% daripada keseluruhan tapak sedia ada sejak tahun 2018 sehingga Februari 2022. Sisa pepejal semasa / harian pula

ditutup secara berkala menggunakan tanah merah (aktiviti *capping*) memandangkan terdapat kekangan kewangan akibat harga tanah merah yang tinggi; dan

- (c) membina fasiliti *Black Soldier Fly* di tapak pelupusan yang telah mula beroperasi pada bulan Februari 2022 bagi membantu menguraikan sisa organik dan mengurangkan jumlah sisa organik dihantar ke tapak pelupusan.

(ii) Perancangan Jangka Panjang:

- (a) membina loji biogas untuk menjana tenaga elektrik yang akan disambung kepada Grid Nasional. Pihak KUMH akan bekerjasama dengan Syarikat Greenviro Solutions Sdn. Bhd. dan Samaiden Berhad bagi melaksanakan projek ini dan kuota daripada Suruhanjaya Tenaga telahpun diperolehi. Kajian ini telah mula dijalankan pada Disember 2021 dan projek dijangka bermula pada penghujung tahun 2022 dan akan beroperasi pada tahun 2025; dan
- (b) projek ini akan menggunakan kesemua sisa organik yang akan diproses di dalam loji biogas untuk menghasilkan tenaga elektrik. Dengan adanya proses tersebut, hanya sisa pepejal bukan organik sahaja yang akan dihantar ke tapak pelupusan dan ini akan membantu mengurangkan pencemaran bau yang signifikan.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPATBELAS 2022**

PERTANYAAN : LISAN

**DARIPADA : YB TUAN AKMAL NASRULLAH B. MOHD NASIR
(JOHOR BAHRU)**

TARIKH : 8 MAC 2022 (SELASA)

SOALAN

TUAN AKMAL NASRULLAH BIN MOHD. NASIR (JOHOR BAHRU)
minta **MENTERI DALAM NEGERI** menyatakan sebarang perancangan dan garis masa untuk menyambung semula pengeluaran MyKid yang dihentikan pengeluaran sementara waktu untuk proses penambahbaikan sistem.

JAWAPAN

Tuan Yang Di Pertua,

Jabatan Pendaftaran Negara (JPN) telah mengeluarkan MyKid yang mengandungi maklumat asas mengenai kanak-kanak seperti yang terdapat pada sijil kelahiran. Walau bagaimanapun, pengeluaran MyKid ini tidak menggantikan Sijil Kelahiran, Sijil Pengangkatan ataupun Sijil Kewarganegaraan.

Buat masa ini, pengeluaran MyKid telah ditangguhkan pengeluarannya buat sementara waktu berikutan penambahbaikan sistem yang sedang dilaksanakan oleh JPN bagi menaik taraf ciri -ciri keselamatan pada dokumen pengenalan diri yang dikeluarkan oleh JPN.

Proses naik taraf ini dijangka selesai pada pertengahan tahun ini dan pengeluaran MyKid yang tertangguh akan dapat diteruskan selepas tempoh tersebut. Pada masa yang sama, Kerajaan juga sedang mengkaji sama ada proses pengeluaran dan ciri-ciri Sijil Kelahiran sedia ada boleh ditambah baik agar kebergantungan kepada MyKid dapat dikurangkan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN WONG TACK (BENTONG)

TARIKH : 8 MAC 2022 (SELASA)

SOALAN

Minta **MENTERI PEMBANGUNAN USAHAWAN DAN KOPERASI** menyatakan apakah bentuk pelan bantuan yang akan diberikan kepada pengusaha gerai (hawker) dan petani kecil yang terjejas teruk akibat banjir khususnya mangsa yang mana gerai serta peralatan telah rosak atau hanyut.

JAWAPAN

Tuan Yang di-Pertua,

YAB Perdana Menteri pada 9 Februari 2022, telah mengumumkan beberapa inisiatif khusus melalui pakej Geran Bantuan Banjir Keluarga Malaysia kepada usahawan informal dan PMKS bagi memulihkan perniagaan mereka dan beroperasi semula.

TEKUN NASIONAL

TEKUN Nasional telah diberi tanggungjawab untuk melaksanakan 2 inisiatif melalui bantuan **geran secara one-off** dengan peruntukan sebanyak RM50 juta dan **bantuan pembiayaan mudah tanpa kadar keuntungan (0%)** dengan peruntukan sebanyak RM50 juta.

Bagi pelaksanaan geran secara *one-off* tersebut, usahawan mikro dan informal yang layak iaitu premis perniagaan terlibat dengan bencana banjir pada Disember 2021 dan Januari 2022 akan menerima geran bernilai RM3,000.

SOALAN NO : 75

Manakala bagi pelaksanaan bantuan pembiayaan pula, usahawan boleh memohon pembiayaan tanpa kadar keuntungan dan diberikan tempoh moratorium selama 12 bulan melalui Skim Pembiayaan Informal dan Mikro (SPIM) dengan nilai pembiayaan sehingga RM10,000.

BANK RAKYAT

Bagi pelan bantuan kepada usahawan yang terjejas disebabkan bencana banjir, Bank Rakyat menawarkan moratorium bagi tempoh 6 bulan kepada pelanggan sedia ada Bank Rakyat.

INSKEN

INSKEN pula menyediakan sesi konsultasi secara percuma kepada usahawan yang terkesan akibat pandemik atau banjir bagi mendapatkan input-input, khidmat nasihat dan bantuan untuk terus bertahan dalam perniagaan. Bagi tahun 2021, sesi konsultasi dilaksanakan secara dalam talian manakala pada tahun 2022 sesi ini dilaksanakan secara fizikal diadakan di negeri-negeri tertentu membolehkan usahawan bertemu secara terus dengan BisKaunselor INSKEN.

AMANAH IKHTIAR MALAYSIA

AIM telah memberikan moratorium automatik bagi membenarkan peminjam yang terkesan untuk tidak perlu membayar pinjaman dari 20 Disember hingga 31 Januari 2022 selain tidak perlu hadir ke Mesyuarat Pusat.

Peminjam atau Sahabat AIM juga dibenarkan membuat penjadualan semula pinjaman sehingga 3 tahun. AIM juga menyediakan bantuan Tabung Kebajikan dan Kesejahteraan Sahabat (TKKS) sehingga RM600 iaitu RM300 sebagai bantuan untuk rumah Sahabat yang terlibat banjir selain RM300 lagi diberikan kepada projek Sahabat yang terjejas.

Secara keseluruhan, AIM telah menyumbang RM120,000 kepada mangsa banjir di beberapa Pusat Pemindahan Sementara (PPS).

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN SU KEONG SIONG [KAMPAR]

TARIKH : 8 MAC 2022 (SELASA)

SOALAN

minta **MENTERI PEMBANGUNAN USAHAWAN DAN KOPERASI** menyatakan pelan dan rancangan pemulihan 'stimulus' ekonomi yang dilaksanakan oleh Kerajaan untuk membantu Perniagaan Kecil dan Sederhana (SMEs) untuk mengharungi impak akibat penularan pandemik COVID-19 agar mereka dapat mengekalkan perniagaan mereka dalam masa yang tidak menentu ini.

JAWAPAN

Tuan Yang di-Pertua,

Sejak Mac 2020, kerajaan telah melaksanakan lapan pakej bantuan dan rangsangan ekonomi berjumlah RM530 bilion untuk membendung penularan COVID-19 dan pada masa yang sama meringankan beban rakyat. Pakej rangsangan yang telah diperkenalkan ini juga memberi fokus untuk menyokong kemampuan perniagaan khususnya perusahaan kecil dan sederhana (PKS), dan memastikan kelangsungan kegiatan ekonomi utama. Ianya turut merangkumi inisiatif – inisiatif bagi membolehkan perniagaan mengekalkan operasi dan meningkatkan produktiviti secara berperingkat.

Ia dimulai dengan Pakej Rangsangan Ekonomi Prihatin Rakyat (PRIHATIN) bernilai RM250 bilion, kemudian diikuti tujuh lagi pakej iaitu PRIHATIN PKS Tambahan sebanyak RM10 bilion; Pelan Jana Semula Ekonomi Negara (PENJANA) RM35 bilion; Inisiatif Tambahan Pakej

SOALAN NO : 76

Rangsangan Ekonomi Prihatin Rakyat (KITA PRIHATIN) sebanyak RM10 bilion, Pakej Bantuan Perlindungan Ekonomi dan Rakyat (PERMAI) RM15 bilion; Program Strategik Memperkasa Rakyat dan Ekonomi (PEMERKASA) RM20 bilion; PEMERKASA Tambahan RM40 bilion dan Pakej Perlindungan Rakyat dan Pemulihan Ekonomi (PEMULIH) sebanyak RM150 bilion.

Di bawah Pakej Rangsangan Ekonomi ini, Kementerian Pembangunan Usahawan dan Koperasi (MEDAC) telah melaksanakan pelbagai inisiatif bagi membantu Perusahaan Kecil dan Sederhana (PKS) yang terkesan akibat pandemik COVID-19 antaranya seperti berikut:

- (i) Skim Dana Kemudahan Khas PKS (SRF) di bawah SME Bank yang menyediakan bantuan pembiayaan sehingga RM1 juta bagi tujuan keperluan modal kerja. Sehingga Disember 2021, sebanyak 927 permohonan telah diluluskan dengan jumlah pinjaman berjumlah RM490.19 juta.
- (ii) Skim Kemudahan Automasi dan Digital PKS (STTF) di bawah SME Bank yang menyediakan bantuan pembiayaan bermula RM100,000 sehingga RM3 juta bagi tujuan pembelian peralatan dan keperluan aset kerja. Sehingga Disember 2021, sebanyak 123 permohonan telah diluluskan dengan jumlah pinjaman berjumlah RM154.04 juta.
- (iii) Skim Pembiayaan Pengukuhan PKS (SMERF) di bawah SME Corp yang menyediakan pembiayaan pinjaman mudah bermula RM50,000 sehingga RM250,000 bagi tujuan pembelian aset dan keperluan modal kerja. Sehingga Disember 2021, sebanyak 97 permohonan telah diluluskan dengan jumlah pinjaman berjumlah RM17.63juta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN TEH KOK LIM [TAIPING]

TARIKH : 08 MAC 2022 (SELASA)

SOALAN

TUAN TEH KOK LIM [TAIPING] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan rancangan Kementerian dalam usaha menangani isu harga barang yang semakin meningkat setiap hari kebelakangan ini.

JAWAPAN

Tuan Yang Di-Pertua,

Kementerian Perdagangan Dalam Negeri dan Hal Ehwal Pengguna (KPDNHEP) melaksanakan pemantauan harga secara harian, mingguan dan bulanan bagi 480 barangang bagi menangani isu-isu kenaikan harga barangang.

Bagi tujuan ini, seramai 980 Pegawai Pemantau Harga digerakkan bagi memantau harga bagi 480 barangang di 1500 premis di seluruh negara. Daripada 480 barangang ini, Kementerian memantau rapat bagi sepuluh (10) barangang yang signifikan kepada pengguna iaitu ayam bersih standard, daging lembu tempatan, daging kerbau import, telur ayam, ikan kembung, cili merah kulai, tomato, bawang besar India, bawang kecil India dan ubi kentang.

Pemantauan secara harian ini membolehkan Kementerian mengambil tindakan awal bagi menangani isu kenaikan harga barangang tanpa perlu menunggu aduan daripada rakyat. Ini memandangkan tindakan siasatan dan pemeriksaan di bawah Akta Kawalan Harga dan Anti pencatutan (AKHAP) 2011 boleh dimulakan sama ada di peringkat ibu pejabat atau negeri berdasarkan pelaporan harga harian yang dikemukakan oleh Bahagian Harga Barangang Negara.

Selain itu, Kementerian juga telah membangunkan Aplikasi **PriceCatcher** bagi mendayaupaya pengguna supaya lebih bermaklumat mengenai harga barangang. Aplikasi ini membolehkan pengguna membuat pilihan pembelian terbaik berdasarkan harga yang munasabah dengan membuat perbandingan harga jualan premis-premis tersebut.

Antara langkah-langkah lain yang turut diambil oleh Kementerian bagi mengawal kenaikan harga barang adalah dengan mengadakan Skim Harga Maksimum Musim Perayaan (SHMMP) dan Skim Harga Maksimum Keluarga Malaysia (SHMKM) bagi menetapkan harga maksimum untuk barangang tertentu pada tempoh tertentu. Sebagai contoh, SHMMP Tahun Baru Cina 2022 yang telah berlangsung dari 29 Januari 2022 hingga 4 Februari 2022 telah melibatkan 8,150 pemeriksaan premis di seluruh negara. Manakala SHMKM yang dilaksanakan pada 1

Januari 2022 hingga 4 Februari 2022 telah melibatkan 43,348 jumlah pemeriksaan premis.

Di samping pelaksanaan SHMMP dan SHMKM, Kementerian juga melaksanakan Penentuan Harga Maksimum bagi Ayam dan Telur Ayam sehingga 5 Jun 2022 ini bagi memberikan kestabilan harga kepada kedua-dua item tersebut. Selain itu, pelaksanaan Program Jualan Keluarga Malaysia (PJKM) yang diperluaskan ke seluruh kawasan Parlimen juga merupakan salah satu inisiatif kepada rakyat bagi mendapatkan barang keperluan dengan harga yang murah dengan kerjasama dari pasaraya dan peniaga setempat.

Dalam masa yang sama, kerjasama dengan Kementerian lain terutama sekali Kementerian Pertanian dan Industri Makanan (MAFI) turut diperkuuh dalam memastikan pengeluaran makanan dan barang keperluan lain dijamin bekalan dan stabil harganya. Libat urus berterusan dengan industri, pengeluar, pengimpor, pemborong, peruncit, persatuan pengguna dan lain-lain pihak berkaitan, tetap dijalankan dari masa ke semasa tanpa gagal.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : PUAN NOORITA BINTI SUAL [TENOM]

TARIKH : 08 MAC 2022 (SELASA)

SOALAN

PUAN NOORITA BINTI SUAL [TENOM] minta **MENTERI PERDAGANGAN DALAM NEGERI DAN HAL EHWAL PENGGUNA** menyatakan apakah langkah jangka pendek dan jangka panjang yang diambil dan dilaksanakan bagi menangani masalah kenaikan harga barang makanan termasuk ayam, telur, sayur- sayuran dan sebagainya yang mana secara langsung meningkatkan kos sara hidup dan membebankan rakyat.

JAWAPAN

Tuan Yang di-Pertua,

Langkah Jangka Pendek yang diambil adalah mengadakan Skim Harga Maksimum Musim Perayaan dan Skim Harga Maksimum Keluarga Malaysia bagi menetapkan harga maksimum untuk barang tertentu pada tempoh tertentu. Kerajaan turut melaksanakan Penentuan Harga Maksimum bagi Ayam dan Telur Ayam sehingga 5 Jun 2022 ini bagi memberikan kestabilan harga kepada kedua-dua item penyumbang sumber protein utama penduduk Negara ini.

Langkah Jangka Panjang adalah Kementerian sentiasa memantau isu kenaikan harga mendadak yang berlaku melalui pemantauan dan pemeriksaan secara langsung ke atas premis yang mengalami isu tersebut. Mana-mana peniaga yang didapati menaikkan harga barang secara melampau, notis bertulis akan dikeluarkan kepada peniaga dan sekiranya selepas dianalisa didapati mencatut, kesalahan dibawah Sek. 14 AKHAP boleh diambil ke atas mereka.

Kementerian bekerjasama rapat dengan kementerian lain terutama sekali MAFI dalam memastikan pengeluaran makanan dan barang keperluan lain dijamin bekalan dan stabil harganya. Libat urus berterusan dengan industri, pengeluar, pengimport, pemborong, peruncit, persatuan pengguna dan lain-lain pihak berkaitan, tetap dijalankan dari masa ke semasa tanpa gagal.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : PUAN HAJAH FUZIAH BINTI SALLEH
(KUANTAN)**

TARIKH : 8 MAC 2022 (SELASA)

SOALAN

PUAN HAJAH FUZIAH BINTI SALLEH (KUANTAN) minta **MENTERI PERUMAHAN DAN KERAJAAN TEMPATAN** menyatakan status terkini pusat pelupusan kekal (PDF) sisa WLP Lynas sekarang sama ada telah mendapat kelulusan PLANMalaysia.

JAWAPAN

Tuan Yang di-Pertua,

Untuk makluman Ahli Yang Berhormat, Mesyuarat Jawatankuasa Perancang Negeri (JPN) Pahang Bilangan 2 Tahun 2021 pada 24 Jun 2021 telah memberikan persetujuan ke atas tapak Pusat Pelupusan Kekal (*Permanent Disposal Facility*, PDF) Sisa WLP Lynas.

Seterusnya, Kebenaran Merancang (KM) telah diluluskan dengan pindaan pelan oleh Majlis Bandaraya Kuantan pada 12 Januari 2022.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : PUAN ALICE LAU KIONG YIENG [LANANG]

TARIKH : 8 MAC 2022 (SELASA)

SOALAN

PUAN ALICE LAU KIONG YIENG [LANANG] minta **MENTERI KESIHATAN** menyatakan adakah Kementerian membenarkan ibu bapa untuk memilih vaksin sama ada Pfizer atau Sinovac untuk anak-anak mereka di kategori 5-11 tahun dan juga 12-17 tahun supaya tidak menimbul sebarang kebimbangan atau keraguan ibu bapa tentang kesesuaian vaksinasi. Jika tidak, kenapa. Jika boleh, bila.

JAWAPAN

Tuan Yang di-Pertua,

1. Bagi remaja berumur 12 hingga 17 tahun, dua jenis vaksin COVID-19 telah diluluskan penggunaannya. Pihak Berkuasa Kawalan Dadah (PBKD) telah meluluskan penggunaan vaksin Comirnaty keluaran Pfizer-BioNTech pada 15 Jun 2021 dan vaksin CoronaVac keluaran Sinovac Life Sciences Co. Ltd., China dan Pharmaniaga Lifesciences Sdn Bhd, Malaysia pada 1 Oktober 2021. Bagaimanapun, PBKD menyarankan agar penggunaan vaksin Sinovac diutamakan kepada **remaja tanpa komorbiditi atau yang mempunyai masalah alahan atau tidak sesuai untuk menerima vaksin Comirnaty**.

2. Bagi kanak-kanak berumur 5 hingga 11 tahun, kelulusan telah diberikan bagi penggunaan vaksin Comirnaty 10mcg Concentrate for

Dispersion for Injection. Sediaan ini mempunyai kepekatan yang lebih rendah berbanding vaksin COMIRNATY yang diberikan kepada individu berusia 12 tahun dan ke atas. Vaksin Comirnaty formulasi kanak-kanak adalah vaksin yang diberi keutamaan termasuk kanak-kanak berusia 5-11 tahun yang **berisiko tinggi dan mempunyai komorbiditi seperti individu yang mempunyai rendah imun atau immunocompromised, penyakit paru-paru kronik, penyakit jantung, kencing manis, obesiti dan lain-lain.**

3. Pada 3 Mac 2022, PBKD telah bersetuju memberikan kelulusan bersyarat bagi penggunaan vaksin CoronaVac Suspension for Injection COVID-19 Vaccine (Vero Cell), Inactivated keluaran Sinovac Life Sciences Co. Ltd., China dan Pharmaniaga Lifescience Sdn. Bhd., Malaysia kepada golongan yang berumur 5 tahun hingga 11 tahun. Sehubungan dengan itu, **kanak-kanak yang tidak boleh menerima vaksin Comirnaty atas sebab kesihatan akan ditawarkan vaksin CoronaVac oleh petugas kesihatan.** Selain itu, ibubapa juga diberi pilihan untuk memberikan vaksin CoronaVac kepada anak mereka sekiranya mereka tidak bersetuju untuk menggunakan vaksin Comirnaty.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

**DARIPADA : DATO' ABDULLAH SANI BIN ABDUL HAMID
[KAPAR]**

TARIKH : 08 MAC 2022 (SELASA)

SOALAN

DATO' ABDULLAH SANI BIN ABDUL HAMID [KAPAR] minta **MENTERI SUMBER MANUSIA** menyatakan jumlah wang yang dikeluarkan dan jumlah penerima faedah Sistem Insurans Pekerja (SIP) setakat Disember 2021 mengikut setiap kategori.

JAWAPAN

Tuan Yang di-Pertua,

Akta Sistem Insurans Pekerjaan 2017 [Akta 800], PERKESO menyediakan bantuan faedah berbentuk kewangan dan bantuan pencarian pekerjaan kepada pekerja yang kehilangan pekerjaan.

Sehingga Disember 2021, PERKESO telah membelanjakan sejumlah **RM374.5 juta** kepada **105,158 penerima faedah** Sistem Insurans Pekerja. Berdasarkan jumlah perbelanjaan tersebut, RM71.8 juta merupakan Dana Kerajaan bagi Program SIP Prihatin 1.0 di bawah Belanjawan 2021.

Bagi pecahan penerima faedah mengikut kategori pula adalah seperti berikut :

- i. 73,929 orang telah menerima Faedah Elaun Mencari Pekerjaan, Faedah Elaun Orang Tanggungan dan Faedah Elaun Pendapatan Berkurangan;
- ii. 19,362 orang telah menerima Elaun Bekerja Semula Awal,
- iii. 6,675 orang menerima faedah Fi Latihan; dan
- iv. 5,192 orang penerima faedah Elaun Latihan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS, TAHUN 2022**

PERTANYAAN : JAWAB LISAN

DARIPADA : PUAN TERESA KOK SUH SIM [SEPUTEH]

TARIKH : 08 MAC 2022 (SELASA)

SOALAN

PUAN TERESA KOK SUH SIM [SEPUTEH] minta **MENTERI SUMBER MANUSIA** menyatakan sama ada Kerajaan memperkenalkan program untuk membenarkan pelarian dan PATI untuk bekerja secara rasmi di sektor ladang sawit, perkilangan, pertanian, kerja rumah dan perhotelan. Apakah rancangan Kerajaan untuk menyelesaikan masalah kekurangan pekerja yang serius di sektor-sektor tersebut.

JAWAPAN

Tuan Yang di-Pertua,

Kerajaan telah mengambil beberapa pendekatan segera bagi menangani masalah kekurangan pekerja yang serius di sektor ladang sawit, perkilangan, pertanian, kerja rumah, perhotelan dan juga sektor-sektor lain. Oleh yang demikian, Kementerian Dalam Negeri dan Kementerian Sumber Manusia telah mengadakan kerjasama strategik dalam memperkenalkan Program Pelan Rekalibrasi PATI.

Program yang dilaksanakan ini, membabitkan dua komponen utama iaitu Program Rekalibrasi Pulang dan Program Rekalibrasi Tenaga Kerja. Kementerian Sumber Manusia menerusi Jabatan Tenaga Kerja Semenanjung Malaysia terlibat dalam melaksanakan pelan ini menerusi Program Rekalibrasi Tenaga Kerja.

Sehingga **30 Oktober 2021**, seramai **360,6311 orang PATI** telah **mendaftar** untuk menyertai **Pelan Rekalibrasi PATI** dan daripada jumlah keseluruhan tersebut, **seramai 212,926 orang PATI** telah mendaftar bagi **Program Rekalibrasi Tenaga Kerja**. Berdasarkan jumlah permohonan ini, boleh disimpulkan bahawa objektif pelaksanaan pelan ini berjaya membantu pemulihan ekonomi negara dengan membantu industri mendapatkan tenaga kerja bagi sektor-sektor yang kurang diminati rakyat tempatan mengambil kira faktor moratorium pengambilan pekerja asing akibat penularan wabak COVID-19.

Rentetan itu, Mesyuarat Jemaah Menteri pada 10 Disember 2021 telah bersetuju untuk membenarkan pengambilan pekerja warga asing dalam sektor yang dibenarkan bagi penggajian pekerja asing. **Permohonan** pekerja warga asing ini telah dibuka pada **28 Januari 2022** untuk **pengambilan 32,000 pekerja warga asing** dalam **sektor perladangan secara pengecualian khas** dan telah berakhir pada **14 Februari 2022**. Manakala, pada **15 Februari 2022** lalu, permohonan **pengambilan warga asing telah dibuka kepada semua sektor** bagi mengatas masalah kekurangan pekerja yang serius ini.

Tuan Yang di-Pertua.

Pada masa ini, pelarian yang memegang kad Pesuruhjaya Tinggi Bangsa-Bangsa Bersatu Untuk Pelarian hanya dibenarkan untuk bekerja dalam sektor tidak formal seperti bekerja sendiri bagi tujuan sara hidup. Melalui penambahbaikan Arahan Majlis Keselamatan Negara No. 23, satu Garis Panduan Kebenaran Bekerja bagi Pelarian akan diperkenalkan.

Kementerian Sumber Manusia telah dilantik untuk mengetuai Jawatankuasa Pemberian Kebenaran Bekerja ini bagi meneliti isu kebenaran bekerja, termasuklah sektor-sektor yang bersesuaian. Dalam masa yang sama, pemberian kebenaran bekerja ini perlulah dipastikan agar tidak menjadi suatu bentuk persaingan terhadap pekerja tempatan serta menjadi faktor penarik kepada kemasukan lebih ramai warganegara asing yang berselindung di sebalik status pelarian dan pemohon suaka daripada pihak Pesuruhjaya Tinggi Bangsa-Bangsa Bersatu Untuk Pelarian.

Melalui mekanisme pemberian kebenaran bekerja ini juga, Kerajaan akan dapat memastikan golongan pelarian ini dapat diambil kira dalam pangkalan data negara dan maklumat keberadaan mereka akan dapat dikemas kini dari semasa ke semasa.

Kementerian Sumber Manusia telah melaksanakan beberapa siri pertemuan dengan pihak Pesuruhjaya Tinggi Bangsa-Bangsa Bersatu Untuk Pelarian, yang mana pertemuan terakhir di peringkat Menteri adalah pada bulan Februari 2021. Kementerian Sumber Manusia sedia untuk bekerjasama dengan Pesuruhjaya Tinggi Bangsa-Bangsa Bersatu Untuk Pelarian dan lain-lain pemegang taruh dalam usaha memastikan pemberian kebenaran bekerja ini dilaksanakan dengan efektif.

Seterusnya, Kementerian Sumber Manusia bersedia menunggu semakan Arahan Majlis Keselamatan Negara No. 23 dan akan melaksanakan pemberian kebenaran bekerja kepada pemegang kad Pesuruhjaya Tinggi Bangsa-Bangsa Bersatu Untuk Pelarian sejurus selepas Arahan Majlis Keselamatan Negara tersebut dikuatkuasa.